

遜志齋集

冊十



線
846.1
6345
25
v. 10

方正學先生遜志齋集卷之二十三

盱江後學張紹謙道益纂定

越州晚學盧演輯訂

十世 孫忠奕

重編

十一世 孫振節

古詩

蜀府敬慎齋

天降大命孔神而明巍巍天位匪德莫承赫赫聖皇天寶子之奄宅九有不冒
四夷百辟是臨兆民是使何遠弗綏何悍弗靡德威所加孰不震驚尙篤祇慎
以奉天明矧惟哲王有此大國天子之祐之寵之錫君子西土厥壤汪汪喬岷
大江式固其疆有臣有民有隣有輔外有戎羌于傲于圉匪格以誠孰克潛孚
匪治以仁疲羸曷蘇教之禦之以恩以禮攘之訓之威武豈第天有顯任舉集
王躬惟克敬慎迺寧家邦惟聖天子肇基百世衆建藩輔以匡來裔厥或罔恭

民亦罔從厥或弗慎下孰敢信惟王迪德懋昭大猷日宣聖學以祇天休悃悃
于思夔夔于守穆穆語言不驚左右視乎在服有秩有倫視乎在廷紀法具陳
視乎禁衛動有矩律視乎郊圻靡有怠逸云孰致之敬慎使然惟克敬慎迺罔
有愆惟爾今王天子攸倚四國攸喜下民攸恃王於齋宮吉士祁祁教言徐徐
溫其有儀蹀蹀黃髮忠嘉啓告直辭靡撓不怒以笑古昔格王永有烈光彼或
慢肆福祿靡常王耽稽古天下取則宜其邦國稽古惟王邦國以康胤嗣用昌
天佑大明藩輔多賢宜於民人於千萬年

讀書齋

翼翼高齋秩秩羣經推辭繹義必敬必誠持心惟虛是受是承立志惟篤是毅
是弘恢廓其量可吞滄溟奮作其勇若捍都城求之勿易思之弗更取之欲博
約之欲精聖言何疑不疑不明聖道何正不正不平融會其殊操植其恆朝斯
夕斯期乎有成外怯不足小德微能內有若無盜溢缶盈惟仁之居惟義之貞
霽月之明止水之澄天君明泰我縱我橫道無不得理無不形富貴敵屣子女

6345
25
V.10

酷刑難玷污辱寧過潔清大之天下小之家庭是經是緯是章是程聖讀庸行
馬牛冠纓博覽孔殷書匱是銘允矣君子夜寐夙興惟誠惟勇有權有衡聖訓
赫臨于几于楹聖經是讀聖德是行

四月一日蒙賜宴浣花新建草堂感恩懷古偶作

靈雨過瑤階朝陽麗金殿吾王講藝餘特賜羣儒宴茲惟杜子宅遺址當郊甸
盛代仰前修高堂歛重建葺茅昭舊迹拓地增新觀棟宇極崇華簷甍儼雕煥
兩楹陳綺席僊醴兼珍膳列坐無俗賓銜恩共酬勸花溪浮砌淨雪嶺當窗見
覽物獨興懷古人如對面追思天寶後宇內疲征戰徒抱稷契心莫覩唐虞禪
薄游經險阻放意娛篇翰使獲遭聖明寧令老貧賤人生鮮遇合自昔共嗟惋
並世或棄捐千秋有相羨吾曹獨何幸淺技蒙深眷難報國士知空為昔賢歎
江山鍾粹美天地存幽贊佇俟英俊興重看盛文獻

臣近述基命錄粗載三代帝王寬厚之政以寓忠愛之私幸徹睿覽過蒙
賜詩寵褒詞高旨遠復增慚荷謹依韻略陳情以謝萬一云



101313443

明哲昔御世虛心禮賢臣令名昭簡策千秋播清芬賢王啓大藩懿德貞且純
英姿邁前烈高志企古人聖學自得師曠代莫與鄰睿謨粲可述善政難具陳
沉復抱雄才著作妙入神下筆百川湧潤澤義與仁陋儒亦何幸趨召奉絲綸
恩言寵賜褻猥謂堪致君仰惟文獻國濟濟申白賓圖治超太古餘光能見分
謹歌擬雅頌烜赫繼丘墳

齋殿觀書恭侍間燕且承賜文嘉勞無任感服謹賦詩一首以抒下情

無爲運王化虛靜契天心神情既昭朗外誘安能侵齋居闕道妙端拱肅冠襟
超然萬彙表儼若上帝臨竹素粲盈前羣言恣窺尋遐思自知要博采仍鈎深
嗜古忘饑渴好善踰球琳冥觀會衆理抗志珍分陰俯仰周乾坤瞬息貫古今
人爵已莫並天貴誰能任賑糶散倉粟贖人捐府金政教洽四境蒼生歌德音
文昭聖明喜誠格鬼神歆陋儒荷寵光避席瞻旒簪垂歡惠顏色灑翰嘉忠忱
瀚海茫無涯豈復資蹄涔譬彼一簣土寧補泰華岑受恩徒徬徨憂懷鬱欽欽
勳鴻希旦奭令名仰回參日新崇大業濟世同舟霖

臣仰德之深非言可喻謹次淵明九日詩韻敘謝萬一

至人憲天德虛心體羣生自爲代工計豈爲濟衆名惟王間世才欽聖奉天明
端居澹無故四海流仁聲毫倪競稽首願王壽千齡如彼岷峨高不驚復不傾
小臣最陋劣夙受顧盼榮孤恩愧明義念舊勞睿情臨風拭病目思見德化成

癸酉歲京府徵考試繼奉蜀王殿下命述事

少時輕離別志氣誇壯強及茲未莫年已復多感傷念昔之蜀都執經侍賢王
放懷禮法地取樂文翰場耆俊滿大廷濟濟會冠裳出言有同趣講藝靡乖方
惟王帝室英聰達世莫當精誠洞千古一目連十行道大才更雄氣溫色彌莊
勞心撫庶政虛己思虞唐封內數十州德聲藹洋洋皇天降嘉貺百穀屢豐穰
感美不自居簡身循典章凝情觀衆妙博問取所長自慚魯鈍學三歲承寵光
避席玉座側設醴金殿旁睿哲能兼容闕失專覆藏采陟等葑菲比珍匪琳瑯
近者迎屬車拜辭褰水陽情真賜色笑感激銘肺腸喜遇大比秋齋宮舍晝涼
寸情擬披豁古訓思對揚雖乏涓埃補忠貞誓無忘豈知事難必曩願弗獲償

徵書京國來迅若晨風翔謬忝較文職守臣啓儲皇儲皇新德一作聽政出令聞

八荒戒飭況丁寧庸薄實恐惶經旬廢寢食嘔欬病在床王人俄繼至幣自藩
閩將強起扶杖迎坐語兩徬徨報國固臣節效忠亦士常趨召違天朝懼非義
所臧王心秉忠孝處事明且詳微衷倘見察庶或貸死亡赫赫我大明幅員同
夏商仁恩洽宇宙帝業熾以昌九有如一家內外咸樂康取士皆爲國何嘗限
封疆蜀道平若砥漢水淺可航胡爲不能往矯首徒慨慷白日流光輝葵藿隨
低昂願王崇明德以慰葵藿望

休日奉陪蜀府諸公宴集

居閑嘆時邁閱世知才短頰爲觀國遊每覺歸期緩羣公盡耆英過從恨殊晚
他鄉親故稀骨肉不在眼非資談詠歡孰使離情展大藩仰仁哲政化崇寬簡
長日自優游茲辰況休澣牲醪出珍賜果蔬隨物產一觴偶相酬萬慮皆可遣
貴同周士肆狂笑晉人爛語樂天趣深心清市塵遠新秋欣已至毒暑行將斷
靈雨席上來微涼座中滿明時古難遇良會世所罕各勉存令猷垂聲繼伊管

蜀府遇夏皆教諭次韻敘德言懷

周道昔淪喪鳳鳥收其聲紛紛徇世士各以智術鳴仲舒起西都蜀漢有孔明
下帷談正誼濡走濟羣生二子苟遇時惠澤被孤惻惜其遭逢謬不見禮樂興
邇來一千年文獻鮮有徵豈無輔相貴未免利祿嬰鄙夫何所知浪竊當世名
致君事莫及好古心徒傾身疲道路長興入江山清偶隨羣臣後獲見百代英
神姿儼淵肅雄論極醇精德政尙寬和西土臻治平福善固天理願治本民情
昔嘆賢豪稀今見德位并寄言同袍子拭目王化行

閒居感懷十七首

鳴鳩知天雨乾鵲知天風蟋蟀最無知亦悲年運窮云何當世士憤憤溫飽中
變故如波濤浮沉安所終

鳳隨天風下暮息梧桐枝羣鷗得腐鼠笑汝長苦饑舉頭望八荒默與千秋期
一飽亮易得所存終不移

乘時功易立處下事少成君看蕭曹才豈若魯兩生賢豪志大業舉措流俗驚

循循刀筆間固足爲公卿

賢有四海志家無一金資言高力不足舉世爭笑之不如富俠子錢刀散孤嫠
閭閻稱行義赫赫名聲垂

竊竊衆所憂不踰衣食間孰知溫飽外可憂非一端賤憂道難行貴憂名不完
誰能斷棄此自樂如孔顏

無事本無尤無作自無愧心超萬化表跡混人羣內卑卑流俗語懶問亦懶對
有時或出門獨撫霜中檜

庭前兩古檜封植今百年女蘿欺衰朽揚翹冠其巔弱榮蒲柳脆鉅幹金石堅
得時不自料歲晚良可憐

我非今世人空懷今世憂所憂諒無他慨想禹九州商君以爲秦周公以爲周
哀哉萬年後誰爲斯民謀

士無及物智每喜華其廬我居豈不敝於道已有餘明取容吾身奧取藏吾書
奚須嘆其陋不見阿房初

秦人奮戎狄蠶食舉八荒自言功德大傳敘萬世長鮑魚臭未絕赤龍歛飛翔
巍巍且莫保瑣瑣安可量

習俗日頽壞疇能塞其源自從井牧廢開此爭激門救弊豈無術得君古難言
田間一卮酒跪酌蒼梧魂

道喪學術敝士心日汙卑躋攀得斗祿寧使節義墮古人安分義卿相有不爲
栖栖糞土中困處固其宜

俗士不知道喜以異自雄安知名世者固與常人同聖賢盡其常縱浪禮義中
何須驚神變愉恍驚羣聾

內有丘山重外有秋毫輕於心不自得誰免慕榮名少賤事干謁尊貴樂驕盈
焉知陋巷士塵芥視簪纓

利欲烈炎火雪燄起縱橫區區一子輿死以口舌爭豈不念迂遠安能負平生
皇皇斯須困炳炳萬世明

胡貊笑紈綺吳越賤堅車羣庸方鷲鷲固謂智士愚刀筆計得失絲粟較盈虧

誰云周公聖對此慚不如

池魚不知海越鳥不思燕蚯蚓霸一穴神龍輕九天小大萬相殊豈惟物性然
君子勿歎息彼誠可哀憐

次王仲縉感懷韻十首兼呈張廷璧

哲后踐貞軌簡策有餘馥彼或趨卑汙流惡寧有足明達知所師鑑古以自燭
惟王寶天縱虛心湛無欲學道期濟人爲善靡徼福羣書不去手萬里瞭在目
鄙臣守鉛槧恩光蒙遠矚穆如首夏風煦若陽春旭才微媿寵厚跡賤慚愛篤
報德諒無階錫嘏徒有祝

東京多節士我懷管幼安騰身風塵表寵祿寧肯于子魚不相諒高位屢超遷
腐鼠欲見污聞之愧心顏

皜皜絲夷恣迥出兩漢前彼哉阿世者變滅同飛煙榮華神所戲貧賤節斯完
此道匪難知胡爲人不然

福生既有胎禍茂詎無根玄理諒不爽羣動何紘紘商周數百載積累基至仁

胤嗣豈皆賢所藉先澤存後王昧經遠謀慮止其身於道或偶合秉心殊未純
永懷極盛時民物熙陽春孟氏好斥霸惡彼能亂真隆中有一士卓然古天民
長嘯六合間草昧思經綸寸心如白日可破萬古昏所遇雖不諧餘輝尙燉燉
使逢高光主禮樂寧沉湮惜其遺書亡大志人罕聞如何徇利子於道不知真
卑卑章句中微祿求潤身可貴不在位可賤不在貧無取一時好當作千載人
翠鳥質微細乃以羽自戕犀象獸之雄每因齒角亡物生無巨小適用反相傷
犬羊死柔弱虎豹死暴強彭聃死於壽夭者死於殤萬生誰長存所貴德譽光
古來志節士立身有大方孰云蕭艾藜果勝蘭蕙芳

封倫論治道感詆習俗濟鄭公若砥柱坐障狂瀾馳嗟此古遺直磊落胸中奇
遭逢英明君計畫得小施劉蕡豈不偉結舌意如癡浚恆寧獨然天運固若斯
焯焯趨愈下滔滔竟何之萬事吾不識聊以善自持

始見澤腹堅又聞谷風至炎熇復能幾木葉忽已墜四序不少停景物日夜異
思之熱中腸不遑食與寐支離如病鶴顧影獨長唳黃雀飽稻梁笑爾垂兩翅

野性拙生理大化無停機
緼袍汗沃若絺綌風淒其
壯士千載心豈憂食與衣
絲來浮海志不是軒冕姿
人生尙聞道富貴復奚爲
賢有陋巷樂聖有西山饑
采頤多所失苦節未可非

保身戒無疾制治憂小康
苟操敬慎心何必求扁倉
依依桃李花安知有嚴霜
松竹淡自守歲晚凌衆芳
小人徒煥炯志士多慨慷
我生豈不貴萬物備天常
天常旣無虧貧賤果何傷

榮華衆所慕志得虞咎愆
賤貧可無憂復爲饑凍纏
有能外兩途逍遙循自然
苟不悟斯道中心何繇宣
曰予素寡昧未達性命原
勵茲不息操夙夜靡違安
奮庸有伊周處約有鸞淵
敬承聖哲訓庶慰遲暮年

追次朱子春懷詩韻

聞鐘理短髮徐步啓荆扉
不知夜雨過園林頓芳菲
江山靜妙顏雲日浮清輝
殘梅落欲盡幽池水痕肥
始見新歲來景物忽如茲
徒爲逝川嘆未遂滄州期
及時貴取樂莫遣青春歸

舟中呈同召葉夷仲林公輔楊大中陳元豐

一作采

本乏適時用誤爲當世知進身愧蹇拙退處乃其宜何意承寵光使車忽來茲
靡靡踰南國秩秩錫多儀嚴程不可稽王命自有期親愛俱在眼弗獲顧我私
聖猷同山嶽微忠劣毫絲黽勉諒何補徒興千載思

上巳約友登南樓

生意忽滿眼不知春淺深良朋曠嘉會濁酒難孤斟迢迢城上樓高朗宜遠臨
曷不一舉趾縱望淵與岑逍遙羣動表舒豁萬古心古人已寂寞繼者應在今
蘊真有至樂外慕非所欽疇昔舞雩詠千秋虞氏琴窮達各有適宇宙流遺音
景風生穆清佳趣溢魚禽願言領衆妙無爲鬱冲襟

次韻

春色與漢水相看兩俱深誰能當此時有酒不共斟城端聳華構賓友皆來臨
東瞻太白雪西望峨眉峯縱觀八紘內洞見天地心千年等旦暮豈識古與今
尙友懷賢豪妄意鮮所欽慷慨隆中嘯窈眇河汾琴其人儼不忘思欲嗣徽音

觴多意不盡譁笑驚飛禽清風似相知數數吹余襟

再次前韻

昔時喜飲酒舉白不辭深及茲中歲來已復畏人斟後生多所忽豈識老會臨
志士惜景光登麓已知岑每聞前事頗見古人心逝者良不息將來誰嗣今
百年當有成泯滅寧足欽每憐伯牙陋鍾死破其琴自得苟堪傳何必求知音
俯觀水中儵仰覩雲際禽真樂不吾隱欣然豁煩襟

送鄭叔貞之成都

謝公江海人雅量極宏廓中年別親友猶謂懷抱惡況我褊迫士志意早衰弱
辟如遠指金詎奈膏火爍豈無骨肉親相望天一角兩生萬里志講道慰寂寞
探奇忘舊悲觀妙有新樂寧知事多忤重使嘆離索林也前歲歸重來忘曩約
鄭子今復去南行踰巘嶠成都壯麗地江水帶郛郭山窺子美堂雲護孔明柏
壯遊豈不佳觀國資所學國僚盡耆俊政簡恆燕醪日開百金筵坐有四方客
摘毫歌盛美文彩紛烜赫卓爾樂邦風魏乎王者宅王誠天人秀令德顏閔若

神機盡經緯大度蘊才略心融羣聖言穎銳智獨覺坐收千古秘萬理隨綜錯
尙友師徽猷姚姒靡間隔勵精施惠政民物沾德澤至化通幽明餘恩及飛躍
小心事天子放意耽簡策道積不自盈怡怡躬吐握知名久佇望前席啓東閣
立談盡歡娛至理無適莫從容倘垂問占對復醇醇爲言寡朋儔舊業愈荒落
疑經待同勘蕪史期共削相須左右肱理勢不可各王仁極深廣夙昔受殊渥
囊餘舊賜錢篋有新頒帛身爲微職絆感歎顏面忤使子能輸忠寧不副所托
金門盛才彥德星耀井絡翹翹白鳳羣豈復少一鶴惟茲山南郡士氣陋且薄
古心莫與論積疢誰爲藥願子早告歸離憂變歡噓四科洙泗道五等成周爵
真知苟內充外物奚須度旱麓清照人漢水淺可濯懷哉春服成重繼詠歸作
又送叔貞之成都

空名誑當世自誤還勞人鄭子復爲誰跋涉窮冬春去年赴上國風雪迷江津
徒步從我行面黑手足皴今茲有徵命欲往志靡伸子復之成都代余陳所因
念子遠遊學三年別慈親敝衣犯緇垢斷裂莫爲紉蜀道幸坦平王化甚惠仁

歷覽快心目庶足忘苦辛諸葛政猶在少陵詩有神浩蕩觀大江穹秀瞻峨眉
心胸蘊奇偉撫事氣益振丈夫平生懷豈惟安其身況可廣咨訪大邦多縉紳
恨我不得俱惟恐孤主恩見王再三謝念此疎遠臣

偶爾遣意奉呈同學諸君子及示叔貞秀才

累物擾靈府澹然無所爲家貧自鮮營萬事俱不知日祿餘一斗麤給菜與糜
秫田亦異畊有酒供四時門多儒雅客暇則斟酌之相對靡俗言共談止詩書
遐情或深契歡笑同解頤孰謂千古遠其人如在茲於心有至樂天地亦可遺
未知軒裳貴詎識勢位卑彼美要路仕賢勞耀輕肥窮通各有適寧論是與非

送謝生因奉寄岐陽公

帝子謹王度大藩臻治平文風播南土四國揚休聲上公國懿親令德惟邦禎
奉恩自夙昔修貢表貞誠名馬西域來玉勒懸珠纓金門足麒麟特受顯盼榮
王昨駐中都貂蟬藹盈庭公來必燕語禮接同友生異質況天挺至尊愛彌甥
勳賢冠當世夷夏欽威名繼美實在茲聞望良匪輕近因師傅重愈見德業成

曆數傳萬年蒼生仰皇明豈徒本支感股肱在公卿海內雖已康民俗猶未寧
鄙夫抱深念思覩禮樂興願公善匡輔報主以忠貞載光史臣籍永邁宗戚英
靈雨洗南麓漢光晚來盈臨流送回使懷古動遐情

發襄城過七盤嶺宿獨架橋閣上

名爲不祥器斯理昔未覺及茲因奔走始嘆立論確險哉七盤山羊腸凌巖嶇
三年入往返顛頭髮早白此行當盛夏溽暑逞餘虐晝伏避蚊虻宵征越林薄
危橋帶襄水俯瞰波流惡鑿石勞衆工緣崖構飛閣下扶千柱壯上倚浮雲弱
怒雷地底鳴懸瀑崖際落山中郵傳少過客資悽泊勞者務苟安寧思非所托
更聞急雨至洪濤相噴薄鬼神助晦冥天地混磅礴病身倦輾轉酣寢絕疑愕
晨興霽景澄林壑還可樂有生大化中萬變相綜錯所遇聽自然何處匪安宅
歷聘魯中叟詠歸沂上客勞逸命分殊順俟安敢擇

過滌陽

露濕塵不起曉行秋氣清遙作瑤天星未沒野草蟲亂鳴途中何所見多見古軍

營斷溝無新

流作

水荒隴存古城爲問戰者誰其人總豪英當時誇氣勢畢命恣

紛爭但恨智力殫詎思時世更寂寞千載後艱勞竟何成身亡事卽已得失存
空名善者或稱嘆惡者受譏評因之念首陽西顧清風生感此默自嘆白日車

前明

過寧陵縣學

師道古所重義與君父同自從東漢來節行著高風繫理或訴冤死請代以躬
收葬與撫孤懇惻貫蒼穹聖賢垂大法勉孝兼勸忠豈聞訟其師擠寘圜圜中
執憲者何心此輩忍見容不惟紊人紀實敷上帝衷至理有相關斯乃教化宗
扶持罔失墜允藉參贊功末俗日悍驕童稚忘敬恭滔滔未有艾酸酸安所從
我行聞怪事竊嘆徒傷恫誰操黜陟柄幸爲懲頑兇

葺書齋舊門扇

安貧未必爾才拙本無能謬隨縉紳後誤以好道稱竭來忝一官行役歲屢仍
風雪走沮洳舊路充炎蒸山南舊草堂居處不得恆前人遺構築一椽無暇增

雙扇昔所關，蠹版同春冰。三年忘葺理，啓闔繫以繩。友生每謂予，朴陋良可憎。曷不稍修治，費少力易勝。人生跡如寄，外物豈須憑。聖哲有廣居，所貴心志弘。雄都多甲第，華棖映雕甍。位崇德義薄，鬼神見侵凌。顧我田野人，貧賤分所應。庇身何必好，取足容曲肱。所冀對康時，尊酒延佳朋。春風日滿座，涼雨宵同燈。順理觀暮息，養恬神慮澄。庶幾謹素節，弗畔顏與曾。

感橙樹有作

有序

秋林道旁有橙樹，處荆棘中不知幾何年矣。會增置驛舍，芟夷堂基，斧斤幾及。遇識者知其爲菓實之美也，獲免築室。旣成正值窗牖間，結實纍纍然可愛，過而見焉，感而爲之賦詩。

橙生蜀山裏，蕪沒荆棘場。荆棘忽翦除，孤根虞見傷。幸遇識者顧，扶植不忍戕。築室適在茲，窗牖正相當。花垂素雪盛，葉茂青雲張。方秋氣肅肅，原野飛早霜。衆木不復榮，百草已罷芳。纍纍枝間實，爛爛半青黃。摘置樽俎間，几席有餘輝。

作

光豈惟巴人羨，南服亦罕嘗。鬼蛾帝王宮，異味來萬方。何以解煩渴，甘酪間蔗

珍傲宋版印
擬此物倘前陳玉食倍馨香可令積痰蠲坐見人情康惜無先容者盱彼途路
長遇世良有會處己貴安常歲寒善自保用舍隨行藏

栽柏

迂拙乖世用每蘊無窮思取效非目前遠與千載期翠柏信良材成長計功遲
茲晨斷煙雨移動盈尺姿清廟嚴潔地聖靈會于斯豈無杞柳輩不足當階墀
殷社夙所尚古制非徒爲先師實殷人植此理固宜但恐枝幹弱不耐風霜欺
培護苟無失終見盛大時三年過人長十年齊桶榱百年必合抱根深柯葉滋
青霄泊鸞鳳厚土蟠蛟螭豈特傲寒暑將堪閱興衰所託況得所永免斤斧危
旣膺顧盼榮復與翦伐辭寥寥百世後神物相扶持何必爲棟梁迺見才氣施
流光若飛翰時代易推移行看好古士追說種者誰我生素多病中歲早孱羸
待爲鶴髮翁見汝凌雲枝志士用心者蓬落爲世嗤何如羣兒巧插槿紛成籬
新栽柏爲瓠蔓所纏令諸生披解以遂生意有作

青青庭前柏稚植芳春時旣承雨露潤歛見雲霄姿盛夏乏人工眼中蕪穢滋

瓠壺引長蔓左右纏蔽之晨興試行觀沉思喟然悲微物凌善類勝負關感衰
巨葉覆其顛濃陰蜜如帷自非爲披折恐使嘉樹萎呼童操短鎌芟彼草與茨
瓠蔓亦徐解扶持向藩籬植物共有生榮枯兩無知貞脆本天質生成仗人爲
仰惟玄造心發育靡偏私於焉別臧否可以人理推漢昭任博陸不受羣邪欺
符堅逐仇騰景略事業施用賢必遠佞果斷貴無疑嗟余何爲者棲屑名位卑
觸物徒有懷於時竟奚裨柏也材氣良取效嘗患遲衆人重口腹愛瓠固其宜
紛紛俄傾計落落千載期浩歌向蒼穹此意知者誰

喜修德汝器二君子偕嘉猷秀才至

宛宛心所慕盈盈日與思今辰果何祥舉目皆在茲經時抱沉瘵杜門謝親知
猶獨莫與徒有懷欲從誰聊求古人志遠與後世期放情簡冊間庶以靜自怡
此意信似拙衆方背而馳非子乘冲襟疇能無棄遺敝廬面落日炎暑每相欺
清談偶有適四座生涼颺久乏經世具孰正生民彝深衷鬱未宣流光迅難追
慨餘喜胥會豈以慰我私相期樹斯道與國隆不基

又

孟春期過我仲夏始來翔咫尺同里居會合猶莫常何況涉遠道各據天一
方言歸雖有期心思詎能忘我如失羣鶴斂翮鷺驚場時逢涼飈發仰首睇穹蒼
子若隨陽鴈高舉隘八荒知時識天敘豈慕稻與梁哲兄富文學簪筆侍賢王
愛國心事苦念親夢魂長朝退寢室靜閱書焚妙香賓僚各兩散思子不在旁
子去義所安講道信有望山河壯都會圖譜有餘芳弔古考隆替撫時推興亡
賈傳論過秦杜生賦阿房千秋繼奇偉亦足宣慨慷顧惟河洛間神丘鬱相當
遠思百聖烈近想羣賢臧載瞻伊水濱二龍宣重光和貞各詣極崇眇交揮揚
後來閩衡傑闡述爛昭章匪是啓靈祕正途已微茫願子奮遐躅整策趨康莊
明明吾所懷暨暨宜力將幽獨靜自憫內視德甚涼方欣麗澤益垂析情增傷
遲子卽來旋緬跡鴛鴦行墜緒俟並緝他岐冀同攘重開萬古昏再覩斯民昌
深期實在茲抱瘵語莫詳行當重執手毋使熱中腸

次鄭好義見貽韻五首

鄭子好古學天機靜而深沖然舞雩詠中有咸韶音茅舍帶流水琴書閱清陰
遊魚戲晴波好鳥鳴遠林那得一笑樂洗此千古心

赤驥困皂櫪垂頭避駑駘王良振長轡蹴踏風雲開古來功名際何代無奇才
當其未遇時誰免蒙塵埃丈夫亮有命勿使心顏頹

少時見白日意謂手可攀仰天邈無階狂走徒賴顏尺綆愧深汲寸管無全斑
聖途千萬里用力恆苦艱安得驂飛龍倏爾升天關

幼安老丘壑千載想高情鄙哉華子魚軒冕良可輕功名世不少孰與節義并
至樂有天貴苟得非吾榮臨風發長歎欲爲智者評

山中一樽酒慰此離別腸清夜步廣庭大星吐寒芒向來負奇氣舉目空四方
棲遲盛年至留滯天南荒君看升帝閑不必真乘黃

乙丑中秋在石鏡精舍同士友玩月後二日家兄寄示會飲分韻諸詩覽
之悵然歎不得與因奉次來韻兼柬鄭君好義四首

我來南山中正見秋月圓我家豈無此兄弟況滿前胡爲輕別離顧影清輝寒

賴有座上客共結無窮歡
愁端旋消釋言笑各開顏
寄謝兄與弟明年相對看
秋霄月正好山谷氣逾清
風簷敞虛牖愛此萬里明
嘉賓自遠至樂飲暢高情
雄談振林谷頓令懷抱傾
叢桂困荆棘時來吐芳馨
物生尙有待吾意詎無成
且終良宵會難值衆美并
酒酣發長嘯似聞鸞鶴聲
惟恐日易出顧影遶庭行
開樽酌月華酒味清且醺
吐氣長風生吹滅天際雲
此身與宇宙誰主復誰賓
有生道爲貴萬事何足論
苦節慕夷齊延年稱羨門
僊凡兩冥漠奸雄猶啖吞
山棲未爲隱頗喜離俗氛
固窮固非潔用世豈吾仁
昏昏坐平旦兀兀行薄暮
豈乏往來人幽懷寡清晤
辭源湮曩濬窟增舊錮
幸子有佳期欣然寫衷素
玄談相應發妙理獨超悟
頗憚尊酌煩易覺光景度
拙身違道遠高世遭衆惡
勉矣循大中心期永無斁

題山水

昔隱林壑中不知林壑美
今來在城闕見之心輒喜
楓林新受霜茅茨隔秋水
安得呼扁舟遨遊五湖裏

楊柳渡

殘月墮瑤天涼風在高樹人行野色分鳥嘯巖光曙川平愜幽眺勝境遺塵慮
日出小舟橫依依楊柳渡

宿夾江寺

窗開覺山近院涼知雨足淡月透疎櫺流螢度深竹心空慮仍澹神清夢難熟
起坐佛燈前閒抽易書讀

二蟲吟

翺翺暮光螢燭舉競飛附沒身煙焰間至死終不悟日月衆所瞻嗟汝不一顧
雖有向明心所從良已誤喧喧秋後蚊白日嗜我肌我雖病無力掃撲亦易爲
憐汝營一飽未得死及之且復縱遣去天運自有時

郭西精舍士友同宿

淹懷終歲思幸際清宵會情深新喜集語愜孤愁退離居積頑鄙處下多尤悔
倦翻謝騫騰羈蹤損貞介含悲靜自嘅抱獨招羣怪非子不我遺斯心復誰賴

天寒四野寂雲斂疎星大霜葉響枯條水灘咽鳴瀨振衣逞玄覽妙趣超塵壒
靜泝一氣先虛涵萬象外林泉皆道情縻組本天械擺落已遺榮過從敢辭憊
祛疑冀閱論立懦佇明誠頽風倘可還曷德斯無懈

追次文公先生歲莫燕集韻二首

靈臺湛無爲一念寂不起外物紛相交飛揚千萬里哲人善操養淵澄復山峙
所期天爵修詎以貧賤恥豈無華軒客膏粱歛頑鄙道義竟無聞放浪徒自喜
滔滔從俗化悄悄爲誰美知言世所難感歎何時已

賢豪居廟堂四海爲興起時乎有不遇淳風化閭里用爲江河流處作喬嶽峙
所逢異通塞內省無欣恥紛紛夸毗輩患失誠足鄙屈身營所欲易愠復易喜
人生貴聞道外物豈真美千載筆瓢生令聞傳不已

歲除祭先奉懷家兄次文公先生病中呈諸友韻

日月行不息我亦少安居違家今幾何忽復五載餘微官悞人事解令親者疎
每思別時語不見空中書及茲歲將闌感嘆正躊躇祀先具薄奠撫己懷厥初

觴酒豈云乏獨酌悶難祛寧當解組去御子花間車

遊石鏡山訪親友會集諸公回途有作

世道久凋喪斯文難合并駕言山中遊來與子同盟高齋在深谷側徑防險行
白日亦蕭散惟聞絃誦聲開筵動芳酌與客張華燈持盃恣歡謔聯床如弟兄
凌晨起盥櫛披襟瞰前楹霜林凋綺葉秋花吐奇英百靈競紛集萬象森羅迎
佳趣心已領新詩誰與評良會不可常俗慮仍相縈登途數回首暫別難爲情
迴溪屢曲渡清流堪濯纓離離莫雲合矯矯孤鴈鳴乘高望遙火彷彿識巖扃
勞生幸脫鞅至道斯服膺從君來借榻棲隱謝浮名

再次石鏡精舍會集韻三首

風日淡秋晚欣此佳會并賢豪昔同調泉石非舊盟祇應念違別忽作山中行
雄談爲絕倒空谷騰歡聲論詩涉風雅深夜張華燈義交無老少情親如弟兄
齋中二三子侍立環兩楹把酒起爲壽禮秩交相迎丈人名文章落紙誠世英
珊瑚與玉樹對之敢譏評乃知高世人不爲塵俗縈秋空白雲散悠然暢遐情

嗟予尚稚劣夙心會簪纓沉潛守編簡愁對寒蟲鳴豈知金石韻鏗鏘振林垌
重茲領秀句願言當服膺匪徼一時譽終期千古名

野性淡無嗜不求四美并喜茲二三友同結歲寒盟願言道義交豈慕青雲行
山深寡轍跡地僻無鷲聲曲几列遺編疎籬翳寒燈凝神對賢哲況共弟與兄
幽蘭藹北牖修竹羅前楹忽聞長者車倒屣欣趨迎貌匪山澤癯器乃邦國英
揚論徹幽邃萬彙隨品評風雲時動盪川岳互迴縈磊落賢俊姿慷慨今古情
不耽好爵貴飄然解簪纓至今懷令望江海傳詩鳴奇懷寄竹帛安居守林垌
小子來問道仰德思服膺從茲勉素業不愧知己名

太古日已遠轉覺浮僞并不聞金蘭契豈願同盤盂浮雲無定態流水難西行
滔滔勢利間豈識韶濩聲翻思機巧徒明滅風前燈閉門絕聞見所親惟父兄
丈人忽來過雅淡振軒楹山禽競喧呼童稚亦歡迎清詩多古調妙論超時英
富貴苟不累貧賤孰能縈羣賢共舒眺萬物屬品評星斗羅奇襟風雲動高情
瞿瞿世儀表濟濟古冠纓孰知枳棘間尚有鸞鳳鳴飯生寡交接遊息在村垌

偶茲觀美德夙昔當服膺幸託龍門賞終期崇令名

病眼喜郡守見過

目疾不飲酒昏昏心意煩忽聞郡守至出戶強開顏况覩温粹姿復聆豈弟言
乃知盛明世屬任多才賢神歡坐忘疲欲起屢相援筍蔬兩餘美細酌林花間
風暖落英過日斜歸鳥喧苦云事填委未暇蘇痼瘵高位不易居斯民良亦難
一夫或凍餒仁者爲悲酸腐儒實無能教士漸素冷臨觴願有祝早使羣黎安

題信可時經歷熨帛圖

聖主恩如天賜帛一萬匹承之錦繡段重之踰金璧西風摧刀尺將爲君子衣
熨貼旣勻調粲粲光陸離防胡猶未已行役何當歸爲君重着絮此地饒寒威
奉懷太史公用盡字韻

隆替有恆期舍生會當盡獨遭誣枉構既往有餘愍哀彼草昧初遺黎困戈盾
英雄逞割據未暇分牝牡公來作著龜王略見封畛上爲宗社鎮下爲邦國準
旂常揭日月鐘磬羅簾篋諷諫陸賈多制作張華敏格天誠密運恤物涕潛隕

氣回窮冬溫力導大川引竭忠職調護垂老辭疾疢謂可樂桑榆相從拾芝菌
安知事乖謬玄造獨何忍顛頓萬里行流離闔門殞所餘已無幾猶受饑凍窘
自顧受深知無能效賄賑是非屬公議不以窮達泯終古仰大名昭回配箕軫
紛紛榮辱論百世同一晒三嘆秋風前目送高飛隼

鄰父攜酒相飲

夷惠俱可慕清和合天真汨予流俗中豈暇思古人抱拙耻爲佞遇物展殷勤
雖無失己尤事過每自嗔鄰翁偶相訪延坐列主賓爲言秫田登願我嘗其新
巨榼傾濁醪鷄黍雜前陳持盃強歡飲禮率意態親顧予寡德業無以給比鄰
何階及爾輩愧此風俗淳酒酣述往事所歷多苦辛却憶全盛時無言指蒼旻
世運有隆替玄造豈不仁父老且少安汝本三代民九重敦政教萬幾盡經綸
行當被嘉澤鼓舞歌聖神

二禽詠

鵲噪未足喜鴉鳴未須憂天道神且遠微物徒喧啾翰音善司晨不免供肴羞

鶴鶴至高潔所識惟林丘鵲鶴隘八荒但爲稻梁謀文彩羨孔鸞繒繳或暗投
沉彼鴉與鵲志非衆鳥儔質陋羽翮短雲霄非所遊性貪嗜飲啄逐逐不自休
饑則搖口吻向人如有求何能洞先幾兆與天心侔禍福有定命所致各有繇
人理固坦夷鬼神良昧幽苟中存仁義自可無愆尤何須浪悲喜爲禽鳥誑譏
來資慰韓愈惡聲感黃州好怪失所守二子非英流吾方友千古遠法孔與周
考祥視素履樂道以夷猶

敬次張南軒贈朱文公韻送董公

昔忝國士薦觀光帝王州強言酬顧問流汗對冕旒有詔試文章下筆心懷羞
退朝東閣下獲與夫子遊夫子燕薊來氣貌何休休至尊重純德特爲儲王留
出入朝兩宮寵恩正綢繆予時報聞罷歸飯田間牛升沉本命分出處非人謀
安知十載後握手梁山幽蟲鳴月耿耿鴈度風颼颼話舊若夢中一笑忘百憂
沉茲林泉窟足以寓冥搜仰看岷峨峯俯視江漢流敬慎以爲楫忠貞以爲鞬
居夷聖所欲勿憚道阻修

題童賢母卷後

南山有喬木柯葉敷重陰匪惟雨露滋土腴根本深童氏秉孝義兄弟同一心
構獲良足多先澤久浸淫卓哉賢母行鄉邦迭嗟欽婦道盡恭睦庭訓肅規箴
救殍糜廩粟收宗散羸金生業隨日增善積祥慶尋繩繩螽斯應玉立蘭芽森
玄理諒靡僭令德斯鑒臨垂裕既有始濟美宜自今永言引弗替百世流徽音
應教恭賦靜妙軒

世故役羣動方寸如旋蓬孰知神妙理乃在玄默中至人本無爲清明常在躬
百念寂不起湛然與天通庶政或前陳聽斷每從容化原有餘地善應無留蹤
齋居樂康時爐熏颺微風忘言對縹帙端拱師黃農茲惟文獻邦富庶古莫同
載敷嘉靖治會見躋時雍

宋五公

李文靖公

李公安平相雅識極淵永惓惓閱無告扣陛日有請格君古不易慮國存要領

紛然土木興始悟先幾炳

王文貞公

威德每多容平世喜迂怪公操鎮靜量不幸當其會神書祀河嶽王府窮賞賚
昭昭知過心寵祿有餘悔

寇忠愍公

寇公社稷臣識遠才亦果張皇澶淵狩佞幸慚計左青衫老作吏赤子淚交墮
宏謨雖不終亦足振媮惰

范文正公

布衣憂社稷此義古亦然桓桓高平志致主二帝前時屯道難合謗息名愈全
繼明有良胤千載陋章賢

司馬溫公

傾否難永圖拯溺有遺巧肫肫反正力誠節作足動穹昊羣邪競迴遁善政恣紛

擾廢興豈人謀千秋仰元老

訊瘧

尊生道不足衛生亦無絲微疴忽相侵坐爲肢體憂凝冰集寒氣挾纒思重裘
虐酸繼踵然締絡不願留陰陽各用事對處天一陬如何兩相值追逐同仇讐
弱質受摧沮有似中喝牛有耳不解聰有目等無眸舌不辯辛甘鼻不別薰蕕
耳目口鼻官焦然共懷愁謂此果誰致試與天君籌吾觀今之人紛紜劇蚩蚩
日趨紅塵市夜醉笙歌樓緣情喪恆性縱欲戕天猷告之養壽命大怒不領頭
云胡反無疾健捷如猱猴方子頗好道少以禮自修觀其居家庭未嘗暫嬉遊
且食不暇飽夕夢孔與周生疾豈有端天君亦知否天君聞之笑汝言理誠優
子病殆天意皆非汝愆尤惟天生俊哲蓋爲萬世謀大欲扶三綱次欲敘九疇
安能閉關臥縮首嗚啾啾孔孟處衰世奔走摧輪駟寧不懷宴安此道難中休
天令所賦授與古豈不侔恐其不自強降疾警惰媮方子暫違疾身疲面無膏
忍見萬赤子病者半九州子能憂斯民厥疾當自瘳苟徒念一身壽考吾所羞
耳受口以告目鼻涕泗流方生豁爾寤百體頰和柔再拜紀嘉言可以垂千秋

次修德雜詩韻 三首

通衢夷且直舉世所共知求端迷往轍顛躓終無歸達人解至理秉心若明曦
敬恭視盤鑑齋莊整裳衣昭昭奉一德暨暨滅衆私爲仁諒茲在彼狂胡弗思
制變易爲失所貴謹未然本心秉靈德洞鑒蚩與妍譬彼達海流出自山下泉
積久諒益深雲濤鼓風煙始學誠已誤補過幸有年力微道尙遠感此徒煩悵
神龍臥深澤不若抱甕滋白日閱重陰不如寸燭輝賢豪初未遇但覺吾道非
紛紛當途子權勢衆所歸兩生困蓬藿屠販建旌麾斯事自古然今人安足悲

初冬雨中獨坐

吾廬混人羣來往劇鼃黽頗欣夜雨來頓使蹤跡屏滔滔流水障悄悄耳目靜
風窗試展書佳趣倏已領平生烟霞癖夙昔慕箕頰抗懷軒冕上雅志星日炳
寧知墮俗流汨沒未獲逞奇懷獨不忘幽念時自省豪雄外身名曠士賤鍾鼎
欲語嗟莫同長歌碧林暝

雜詩四首贈林嘉猷

伊周不治經董賈不言文宏謨塞宇宙高論追典墳如何末代士操觚動成羣
但要言辭好不顧心志分至道豈難行彝倫人共聞勉哉不遠復恭默事天君
循循勇不逮頷頷善或虧古人患才難何以當世推自吾行四方所見多有之
豈乏俊爽流未足慰我思聖道充天地其微入毫絲非精莫能察非敏莫能爲
致用貴不頗篤守在不移繇來賢哲事皆本純粹資顧子亦陋劣前徽亦能追
仰止二三友有過頻相規

操行一不慎坐取終身憂發言一不思或爲萬世羞過小莫吝改進德勿厭修
誰能百無爲自效孔與周

載籍彌九有羣言劇毫毛棄置患術疎窮探畏心勞何繇領其要可使道藝高
聖學亂百家黍稷雜莠蒿良農善別識培溉復芸耨取大成吾身致用同伊皋
彼哉溝澮魚豈足連九鰲

次韻贈國亮經歷

君侯昔筮仕匹馬之幽并先子守東藩始結鄰壤盟寧知十載後握手山中行

鬢髮白欲盡，輻光復潛聲。話舊若夢覺，痛飲張華燈。尚欣古義敦，愛余均父兄。
雨洗秋色淨，羣山擁前楹。山鳥喜客來，飛鳴似相迎。緬想天下士，公是世外英。
流俗何所知，紛紛好議評。莫邪雖在土，龍氣上迴縈。自非水鑑識，誰知江海情。
談詩較李杜，起舞笑絕纓。太音久闕寥，厭聽寒蟲鳴。麟鳳居空谷，何繇在郊坰。
處世愧郭泰，通家慚李膺。巖棲倘有約，相與棄榮名。

雜詩四首

相如妙文辭，高處無與敵。多財爲身累，終老汙名蹟。人生取予際，千載觀令德。
苟富何足論，喪節良可惜。

好名未知道，古人有揚雄。著書欲傳世，不暇修厥躬。聖言德之餘，屈伸與天同。
哀哉大節廢，豈足稱固窮。

賈生信英才，蚤識當世事。身逢致治期，遇主亦天意。道高固難合，流俗工媚忌。
一死尙足多，千秋想奇氣。

幡幡市井人，出納量錙積。財至千萬侈，然夸有餘華。堂占廣陌列，肆遍通衢。

朝餐聚俠客暮飲羅名姝一朝與法遇家破及妻孥金玉歸縣官不能贖其軀
郭解既夷滅季倫亦門誅安知子原憲窮巷歌唐虞

修德以詩寄次韻

藜羹淡無和腐粟春難圓羞將饋俗賓歡笑置子前子豈乏梁肉對之每欣然
云胡恐費我來往動經年子行信勞止吾道良足憐深期挹嘉話不必枉華牋
抱店百日臥欲言無與朋敦敦守一床鬢脫影如僧豈惟形容悴智識無絲增
視此不棄捐子心一何弘細人忌名軋俗士爲利懣孰能使余慕君子固有恆
營營苟得者忍以利易生徇欲遂忘反捐軀匪其情古人崇仁義講切極粹精
於斯弗自得猩狖垂紳纓貴有不足懷賤有不足輕景公徒千駟子真豈其卿

再和并簡林嘉猷

夜光自有輝不因磨礪圓騏驎自致遠不以鞭策前古來知道者天質固使然
師友發其微成德在早年余少稍有慕今也反自憐子誠肯開我嘉言著來牋
十年窮取友四海幾得朋豈惟得吾徒旁及老與僧自昔得王子勃鬱氣爲增

子才信已毅愧我德未弘所患涉道淺未免臨事懵何繇與子隣講習日可恆
溫溫我所愛處子有林生匪惟質柔嘉迥出遺世情從我南山遊斷雪煑黃精
共悲狙喜怒靜閱猴冠纓生也尙審思勿言韋布輕巍巍孔孟業豈以爲公卿

送一宗和尙次蜀王詩韻

有序

成都大慈禪師欽公一宗與余皆天台人雖所趨殊途而相見萬里之
外有足樂者今將暫還故山謹次賢王殿下賜草堂長老詩韻以寓別
情里中故人有相問者幸爲謝之

浮雲在山中浩蕩隨去來來非有所係去亦忘所之若人釋門秀矯矯孤鶴姿
林泉三十年喜譽如波馳平生西方學所蘊未及施一朝忽乘興來謁岷峨師
微笑坐談空傾城走羣縉遂令好事者懶問子雲奇清香焚柏子細雨灑楊枝
相逢話鄉曲麈尾不暇麾越蜀萬里途各處天之陲胡爲偶至此欲語忘其辭
歷歷世間事星星鬢中絲迢遙無所嬰老大祇自知巴江復舉棹故廬訪遺基
散懷天台月濯足槽溪漪我亦倦遊客歸耕有深期身在華山陽夢繞大海湄

徘徊將何說祇恐負明時

家兄寄中秋會飲詩因分韻述懷以答

時過不自惜長年轉多憂壯心若湍水湧激不少休念昔童稚日此身百無愁
良宵見明月喜躍如有求大母方壽康諸祖未白頭開筵羅廣庭蔬果間殽鱸
先公奉觴起叔父迭獻酬玉立四五人文采皆琳瑯酒行聞雅歌鹿鳴和呦呦
豈無辨難言禮義皆先猷脫略輕萬事高視曠九州每卑楚漢業或誤良平謀
奮袖時抵掌舉箸借前籌坐間二季父豪俊逸無儔慷慨頗蠡起自許公與侯
酒罷寧復眠長吟倚危樓夜闌得秀句叩戶來相投我時被鍾愛兄弟共譁咻
席賓欲亡酒輒笑牽衣留轉眼二十年存忘兩悠悠庭闈音容絕門戶變故稠
巢壞鶴上天雷行龍脫湫惟餘老仲父衰鬢對清秋今歲月最好我適南山遊
含情面樽俎感歎蓋有絲伯氏欲相寬新詩遞來郵發函清淚墮紙濕不可收
永思舊所見一往如川流于今會飲歡頗似昔日否我家勢運謬難與時人侔
譬彼百年屋不足施雕鏤願伯善扶持重使楹棟修庶免傾壓虞百口蒙庇庶

我愚更懶惰，樸學愧前修。術疎何所成，言高每難讐。空懷濟物志，夢寐談孔周。歲華易爲度，自哂等浮漚。長恐墜遺業，上貽先人羞。伯也幸憫我，正救愆與尤。復爲戒諸弟，敦睦無相尤。道德在詩書，爲生視田疇。天倫苟足樂，外物皆懸疣。骨肉豈異人，風波同一舟。持家尙禮讓，處衆貴和柔。堂構倘樹立，梓杞加丹雘。重還當時盛，豈特才藝優。世欲登虞唐，吾將老林丘。終斯友愛樂，黃髮敘綢繆。深衷久有懷，對月偶歌謳。歌竟視天宇，寒光衝斗牛。

寄好義

同鄉不相見，動涉秋去春。何意忽來翔，會合當茲辰。雄談有遠趣，文采驚世人。譬彼隨和質，衆目咸知珍。陋俗乏奇士，懷抱鬱未伸。每思伊葛流，磊落展經綸。志大固難售，心孤邈誰親。君來起我意，頗覺氣爲振。炳炳千古事，悠悠三代民。舉首視大荒，汗顏慚此身。深衷非一端，欲語未及陳。胡爲復求去，重使別恨新。夙負江海情，恥爲兒女仁。賢豪日衰謝，感歎易悲辛。涼風吹碧海，月露洗高旻。酒至且持斂，言歸何所嗔。

送友人之雲南教官

地遠會面難情深嗟別速今衝微雨去欲向誰家宿山城碧雲裏茆舍清溪曲
莫厭官寂寥終期化夷俗

中山晨望柬錢克溫

月落江水明疎鍾發林杪濛濛山氣合歷歷川光曉妙靜玄化機縱意羣動表
悠然悟真趣忽覺天地小是身本無累萬事相紛擾願釋經世情於茲共幽討

閒居偶題

雨歇堦草淨鳥鳴叢竹中偶無輪鞅過遂與山林同晞髮庭際日振衣松下風
自非捐世故誰得此相從

勉學詩 二十四首

殘燈結成花枯竹化爲菌凋零如此物秀氣終未盡人心最靈智自棄獨何忍
聖門本弘大梯磴多接引曾高愚魯資直解配顏閔流年急如箭髮白難再鬢
及時不努力老大成蠹蠹

樹木生有枝子弟教及時七年異男女八歲分尊卑二五學書計逢人多禮儀
三五學射御四五加冠綏今來謾不省古道當如茲欲作高高臺爲爾寬作基
欲求深深井爲爾遠爲期不聞鄒孟學還自俎豆嬉人材日衰少善保膝下兒
兒童聚嬉戲不離父母傍父母顧盼之百憂爲爾忘惟此慈愛心比同春日光
陽和透地脈草木俱芬芳兒身已長大能不念往常愉色與婉容傾心奉高堂
嗟哉力何短父母恩甚長

上堂拜父母甘旨手自供入廟羅豆邁祀我祖與宗死者魂魄安生者恩義隆
一門無二志聲教生春風豈惟薰閭里上聞天九重祥雲及膏雨滋我庭下松
孰云唐虞遠不得身遭逢繇來豪傑士世世皆時雍

藹藹桑梓樹遲遲杖履音未瞻父母顏已起恭敬心樹木手所植杖履身所任
此物猶足重況彼鍾愛深父愛我亦愛不間獸與禽六親同骨肉何以能相侵
莫驅屋上烏烏有反哺誠莫烹池中鴈鴈行如弟兄流觀飛走倫轉見天地情
人生處骨肉胡不心自平田家一聚散草木爲枯榮我願三春日垂光照紫荆

同根而並蒂藹藹共生成

妻賢少夫禍子孝寬父心不知何人語相傳猶至今室家兩相好如鼓瑟與琴
二親豈不驩花木羅春陰雖云一樽酒共酌還共斟物情動相失安用儲千金
家睽在婦德彖繫有遺音

內則記孝養檀弓著哀思寥寥三代音於此獨見之我欲繪作圖豈乏丹青師
丹青狀形體性情那可爲冬夏適溫清芳鮮在盤匱二親未飲食如子渴與饑
奈何報本心限以百歲期飛鳥失其巢尙且鳴聲悲創鉅痛亦深衰麻交涕洟
聖王爲制禮進退隨天時千人萬人心一人心可知

謙人夏侯氏有女志獨高夫家盡蕩滅節義終持操榮華昔共享禍患今同遭
妾身偶生存志已埋黃蒿親戚勿訝我人類異羽毛引刀斷耳鼻見義不見刀
至厚莫如地桑田變波濤真金不畏火見此女兒曹

結交如結心取士須取德古交金百鍊古士麟五色如何當世人作事多傾側
甘言轉相媚內險不可測青青好禾稼生此螟與螳堂堂美少年化爲狐與蜮

人心天機在利欲日夜昏好苗莫助長惡木先除根斧斤一時緩惡木何絲斷
莫畏根株深所憂筋力短

吉人語何少凶人語何多多言亦反覆簡默終無他可磨白圭玷言玷不可磨
有口號談天有辨誇懸河心原一己放觸物生偏頗悠悠百年內榮辱當如何
驅車入東洛策馬上西京所遇何表表莫非公與卿旌旄出廣路百步辟人行
前驅與後擁不絕如雷轟人生處困阨孰不思寵榮此途良足樂此任苦不輕
丈夫誓許國身作萬里城永懷鼎足戒毋使公鍊傾

五行各異氣萬物無全材聲當配匏竹味卽調鹽梅何器不適用有根當復培
山中多松柏城中多第宅孟嘗千金裘一狐難取白

田單拜齊將卽墨乘孤危羣心效死鬪燕士不敢支一朝寵祿感惜身思自持
小敵竟不下大寇空若箕功名每如此樹立終陵夷國家匪憂危寵爾將何爲
動懷首鼠計退與災禍期向非魯連子身死節亦虧

鸞鳳寡儔匹玉樹少枝柯貴人在高位骨肉苦無多輕車駕駟馬妙舞隨清歌

獨樂不如衆中心欲如何東家借一軸西家求一梭織成十丈幕周我堂之阿
至親隔咫尺舊首如山河

人生四海內同作兄弟看一夫向隅泣滿座爲無歡豈我無衣裳念爾饑且寒
豈我無梁肉爲爾不能飧羣生本一原有此惻隱端胡爲自汨沒功利日相殘
辟如同母兒給之豆與簞奪彼以與此終非心所安

飲馬長城窟窟中水無多秋風動百草水面亦生波長城備外侮室內起干戈
非關絕地脈乃是傷人和不見豐水上靈臺鬱嵯峨前有大雅詩後有秦民歌
鍾塗得苦水流毒如江河

黃河西北來云自崑崙坻經行非一山回薄半九州上有不測源下有無盡流
萬化同此機不知幾春秋分明天地心不爲淺狹謀癡人用小計顛倒若無求
安得申韓氏化爲古伊周

布帛文被體粟菽味充饑常人未識察往往爭好奇貪奇不願寶刻成無當卮
大鈞播萬類瑣細各有宜得時易長養失敘徒施爲哀哉楊朱淚滴向他路岐


正途亦甚坦舍此將安之

蜘蛛解布網蛭蟻能轉圜萬物各有役何人得安然周公貴爲相仰思夜不眠
仲尼大聖人易書三絕編孰謂我有耳不聞古所傳一聞敢自墮勇志如奔泉
好龍非真龍藻繪等兒戲懼虎思虎傷聲容凜然異六經豈虛文中有無盡意
一從河出圖光景不可閱皎皎如日星悠悠在天地青編積几閣翻閱何容異
曾參之一唯已往難再值

勸爾一盃酒君行莫匆匆君心難欲速道路久乃通東可窺大壑西可越空同
不憂歲月晚但憂筋力窮三年刻片楮九年成一弓制作雖云難爲藝則已工
小事可喻大願言置胸中

離離園中樹花開動無數或紅如丹朱或白如瑩素今日正自佳明晨不如故
易感還易衰浮華眼前度物情何參差天地均雨露南山有松柏壽並金石固

方正學先生遜志齋集卷之二十三



方正學先生遜志齋集卷之二十四

盱江後學張紹謙道益纂定

越州晚學盧演輯訂

十世 孫忠奕

重編

十一世 孫振節

蜀王殿下賜行廚酒膳奉謝

天門傳詔飛金符帝子發春朝帝都萬里巴江引軸轡朝離瞿塘莫荆巫牙旗

羽扇照江湖馮夷操楫龍伯扶威振海若警天吳袞衣登朝玉陛趨至尊撫問

情鬱紆奏還大國天語俞却從周秦行坦途乘傳西來試馳驅日行三百尙未

晡親藩留晏窮歡娛秦民擁路觀金轡口稱威德目睢盱共說賢王世所無南

入荆門喜氣蘇蜀邦密邇忘崎嶇山花爛熳雲模糊綠樹清江如畫圖漢中小

臣章句儒早向王門曾曳裾是日來迎拜路隅按轡遙看笑且呼暮抵行宮侍

直廬華燈照夜鋪甃餽從容前席講典謨玄談蟬聯如貫珠上探千古周八區

鄙諂榮辱聖爲徒更闌喜極行玉壺叩頭舉白紅生膚侍臣奉教恩意殊大官
美醞貯行廚特賜歸飲不用沽上尊珍味甘相腴受之無功辭有辜心感王恩
厚矣乎獻諸祖禰頌妻孥招致朋僚洗疊觚共飲相歡同賜醕平生飲水兼茹
蔬祇將鉛槧代耕鋤近爲校教食民租尸居靜閱年歲徂世人視之等泥途賴
逢聖主意氣孚討論聖猷師古初經綸萬里髮在梳小臣學術本蠱疎志廣年
荒才更迂量同溟海肯納汗欲致衆駿先收驚願王道德爲世模摩撫疲瘡恤
鰥孤南漸瀘戎北羌胡陽和發生無朽枯育民興賢語不誣行致孔明與夷吾
共康國政秉事樞保釐西土佐唐虞不數蠶叢及魚鳧吾王端拱化日舒從此
感恩非一夫

歌風臺

歌風臺下春水黃歌風臺上春草碧黃河之水日夜流碧草年年自春色漢祖
當時爲帝王龍泉三尺飛秋霜五年馬上得天下富貴樂在歸故鄉臺前老人
爭拜跪拄杖麻衣見天子龍顏自喜還自傷一半隨龍半隨鬼翻思昔日亭長

時一心捧檄日夜馳卽今宇宙過四海一榻之外誰撐持却令猛士鎮寰宇安
得長年在鄉里可憐創業垂統君后使乾機付諸呂淮陰少年韓將軍金戈鐵
馬立戰勳藏弓烹狗太逼迫解衣推食何殷勤致令英雄遭婦手血濺紅裙當
斬首蕭何下獄子房歸左右功臣皆掣肘還鄉悲唱大風歌向來老將今無多
咸陽宮闕親眼見不忍荆棘埋銅駝臺前老人淚如雨爲言不獨漢高祖古來
世事無不然稍稍功成忘險阻荒祠古廟名歌臺前人已盡今人哀感激悲歌
下臺去斷碑春雨生莓苔

潼關

潼關將軍才且武五千士卒健於虎朝廷養汝爲阿誰盜賊公行如不覩昨日
官軍將到關西風放顛塵滿天錢囊衣篋繫車後歛來掣去同鸞鷁南望京師
五千里僮僕所資餘有幾離家漸遠親故稀向我長號淚如雨嗟嗟僮僕汝莫
愁聖人在上治九州會看海內皆富足關不須防無盜偷

淮陰

淮陰城頭落日黃淮陰城下秋草荒古城西繞淮水長猶如背水陣堂堂當時
大將功無雙顛羸蹴項勇莫當丈夫何乃爲假王至今遺恨令人傷漂母一飯
千金償解衣推食那敢忘相君之背貴莫量蒯生此語無忠良慎弗出口遭吾
撞歌風帝子歸故鄉思得勇士守四方胡爲烏盡良弓藏

題嚴子陵

敬賢當遠色治國須齊家如何廢郭后寵此陰麗華糟糠之妻尙如此貧賤之
交奚足倚羊裘老子早見機獨向桐江釣煙水

赤壁

東夏口西武昌赤壁峭絕當中央奸雄將軍氣蓋世敗卒磊落慚周郎得鱸魚
沽美酒孰若黃州蘇子瞻謫向江湖動星斗噫吁戲曹公氣勢蘇子文章人物
銷鑠塵跡荒涼惟有江水千古萬古空流長

弔李白

君不見唐朝李白特達士其人雖亡神不死聲名流落天地間千載高風有誰

似我今誦詩篇亂髮飄蕭寒若非胷中湖海闊定有九曲蛟龍蟠却憶金鑾殿
上見天子玉山已頽扶不起脫靴力士祇羞顏捧硯楊妃勞玉指當時豪俠應
一人豈愛富貴留其身歸來長安弄明月從此不復朝金闕酒家有酒頻典衣
日日醉倒身忘歸詩成不管鬼神泣筆下自有煙雲飛丈夫襟懷真磊落將口
談天日月薄泰山高兮高可夷滄海深兮深可涸惟有李白天才奪造化世人
孰得窺其作我言李自古無雙至此采石生輝光嗟哉石崇空豪富終當埋沒
聲不揚黃金白璧不足貴但願男兒有筆如長杠

題李白觀瀑布圖

天寶之亂唐已亡中興幸有汾陽王孤軍匹馬跨河北手扶紅日照萬方凌煙
功臣世爭羨李侯先識英雄面沉香亭北對蛾眉眼中已見漁陽亂故令邊將
儲虎臣爲君談笑清胡塵朝廷策勛當第一珪組不敢縻天人西遊夜郎探月
窟南浮萬里窮楚越雲山勝地有匡廬銀河掛空灑飛雪醉中信馬踏清秋白
眼望天天爲愁金閨老奴污吾足更欲坐濯清溪流英風逸氣掀宇宙千載人

間寧復有夢魂飛度斗南傍笑酹廬山一卮酒雲松可巢今在無九江落照連
蒼梧欲從李侯叫虞舜盡傾江水洗寰區

題李白對月飲圖

明月出高樹上懸青天中下有萬頃之長江揚波泛彩清若空江風吹人色淒
凜此時對月誰能寢十千斗酒何足論舉杯宜就花前飲花前飲酒無與儔酒
酣意氣輕王侯仰招行雲不可得但見月與河漢俱西流僊人伐桂樹玉女倚
瓊樓顧盼暫相悅棄去終莫留昨日已浩浩今日復悠悠人生如飛光及時不
飲空白頭君不見月中玉兔搗靈藥不能醫此萬古愁何如醉臥長不醒天地
與我同虛舟混混六合間浩然何所求

徽宗花鳥圖

宣仁升遐司馬死宋祚當時已中否豈知禍亂猶未休更立端王作天子簡書
四出捷星馳重見熙豐舊設施太室既崇荆國祀朝堂新刊黨人碑廷臣往往
多鉗口四海禎祥無不有萬金寶藏造池臺千里樓船載花柳君臣自詫文德

修不數唐漢追商周陳鍾考鼓按雅樂厲甲揚戈昧遠謀宮中從容萬機暇酣
飲逸遊忘晝夜御輦時過宰相家微行或飲倡樓下宣和殿內玉屏風綺席金
爐處處同詔遣內官宣畫史時拈象筆極形容神機密運回天巧萬歲齊呼盡
稱好玉龔裝軸錦裁題墨署花書朱篆寶心怡意適藝愈良自道丹青過百王
盡將兵籍副邊將還信奸臣斥俊良契丹滅後金人喜猶剖王封賞閹豎露布
初騰紫陌塵天驕已渡黃河水汴京鎖鑰一時開雉扇鸞輿去不回圖書萬卷
入沙漠奎璧無光天爲哀祇今俯仰三百載南北興亡幾更改廢陵已發社無
基尺素誰家尙收在吾知此畫非人爲當有神物常呵摩故留花鳥在人世要
俾後來懲戒之古來君德在仁義小技雖工何足計不見昭陵一藝無偉績鴻
名照天地

錢氏家山圖

錢君望鄉勞夢思陳君奮筆爲寫之毫端歛吸驅鬼物風霆捲地山川移紫雲
峯高當面立獅子灘聲轉山急翠竹搖風市塵遠青楓夾路樵歌入山脚盤迴

到石門桑榆深映數家村百年丘壟澤未泯中古衣冠今尙存高堂老人年八十皓首紅顏瞳點漆柴門拄杖望兒還坐聽庭鳥心若失錢君一見增喟傷此身如在淮水傍摩挲門戶欲歸去細看無路墮渺茫乃知陳子善戲劇故假丹青惱曾臆世間萬事無不然畫地作餅安可食陳子亦是憶家客不特戲人兼自釋沙際扁舟已上檣何當共載歸故鄉

題南屏對雪圖

昔年歲莫京國還艤舟夜宿南屏山山風吹雲天欲壓夜半大雪埋江關清晨倚樓望吳越六合玉花飄未絕恍疑江水駕山來萬頃銀濤湧城闕山僧好事喜客留置酒開筵樓上頭玉堂僊人宋夫子紅顏白髮青貂裘坐談今古如指掌共看雲收月華上寒輝素彩相蕩摩碧海瓊臺迭蕭爽酒酣擊節心目開慷慨弔古思英才荒祠古柏岳王墓廢湖殘柳蘇公堤一時嘉會難再得僊人上天塵世窄王子何年繪此圖正貌南屏舊遊迹吾知王也奇崛人新詩妙墨俱絕倫偶然揮灑豈無意神授髣髴存天真世間今古同飛電回首人豪都不見

空有羅山石室書夜夜虹光射霄漢

江山萬里圖

我昔奉勅辭金闕西下巴川持使節僂槎二月出龍河萬里春風掉晴雪吳江
茫茫入杳冥棹歌初過峨眉亭錦袍不見李供奉白雲遮斷三山青烟蕪漲綠
知何地白鳥雙雙沒淮樹片帆風滿疾如飛矯首驚看坼流去大孤小孤橫雪
波匡廬五老青嵯峨九江秀色嘆奇絕半空飛瀑懸銀河推篷竟日閑吟倚瞬
息舟移洞庭水君山如黛壓中流十二煙鬟鏡光裏好山遠自峨眉來瀟湘練
明天際開疑峯九點落空翠重華孤墳安在哉武昌地轉多遺迹隔岸鳥鳴瞻
赤壁烟焰旌旗魏武兵綸巾羽扇周郎策扶醉曾登黃鶴樓漢陽城對鸚鵡洲
卽從鄂渚權明月泝流直上窺荆州夷陵山勢多重疊楚樹蠻雲遠相接欲向
夔城入錦城還於巴峽穿巫峽神女峯前路欲迷瞿塘灩澦聞猿啼五溪越盡
見雲嶺但見鳥道青天低萬里橋西看立馬足迹經遊半天下愧無草檄擬相
如笑擲橐金輕陸賈今年詔許臨丹丘夢中往往驚羈愁江山誰寫入圖畫眼

中歷歷如經遊岸巾一覽發長嘯滿襟爽氣高堂秋

題王叔明墨竹爲鄭叔度賦

吳下王蒙藝且文吳興趙公之外孫黃塵飄蕩今白髮典刑遠矣風流存華亭
米芾稱善畫每觀蒙畫必數詫謂言妙處逼古人世但相傳倍增價昔年夜到
南屏山高堂素壁五月寒壁間舉目見修竹煙雨冥漠蛟龍蟠呼童秉燭久不
寐細看醉墨王蒙字固知蒙也好天趣畫師豈解知其意分枝綴葉人所知要
外枝葉求神奇天機貴足不貴似此事不可傳諸師離溪鄭君好奇士愛畫猶
能賞其趣嗚呼世間作者非不多鄭君甚少可奈何

失硯嘆

吾家石硯玄玉色來自扶桑海中國盪摩日月露光精吞吐波濤含潤澤天生
奇質爲世用海王龍伯不敢匿少時得之方外人四座傳翫皆歎息二十年來
親翰墨北走洙泗西梁益錢塘會稽屢遊歷鬼神呵護同琪璧水怪山精皆辟
易佐我爲文寫胸臆上探文化與爲敵宣暢民彝輔皇極雲雨布濩飛霹靂倏

忽變遷靡定迹謬致聲名驚四方招謗速侮不煖席其間損益兩相補硯也於
余良盡職豈知萬事不可料昔者相親今不得潼關羣盜何太劇竊賊行人俟
昏黑金錢雖失不足數此硯使我深痛惜我非翫物有偏愛又非昧理苦蔽惑
直傷美器不遇主有似賢才受驅迫真卿奉使陷叛臣蘇武持節幽異域忠肝
義膽貫天地豈忍包羞汙凶逆孔子春秋至謹嚴細事不肯登簡策大弓寶玉
二物耳特書盜竊懲亂賊我誅鼠輩恨無力著作有心裨六籍何時見汝生羽
翼奮飛重來侍吾側不然變化爲星辰照臨下土當烜赫外物聚散如置奕胡
爲念汝長戚戚君不見自我得之失無憾不如蕭公差達識

扇

寒藤陰壑懸風霜剝皮擣骨收溪光銀漢半邊秋月白瑤臺一幅春雲香青旗
翠纛湘潭竹寶刀纖纖破寒玉束來十二碧琅玕鳳骨凝香冷盈掬吁嗟造化
絲天功乃知製作歸良工膠漆投情作鸞偶卷舒懷袖生清風清風飄飄可人
意忽覺聲名滿天地南州溽暑恩愛多只恐涼颿入庭樹

紅酒歌

田家八月秋秫黃，脰肩滿檐金穰穰。西成萬室喜登場，斗酒勞慶年豐祥。天台山人傳祕方，釀成九醞丹霞漿。紫檀槽頭秋點長，絳囊醉壓甘露涼。猩紅顆滴真珠光，蓼花色比桃花強。薦新設席請客嘗，風吹桂花滿屋香。饌出肥鷄一筋肪，橙斫蟹膾雙螯霜。不須琥珀琉璃觥，不須太白力士鎗。我愛真率田家郎，磁甌瓦盆罌木觴。爛熳爲我澆吟腸，新詩吐出雲錦章。醉來興發恣豪狂，高歌起舞當斜陽。出門一笑爾汝忘，大江東去煙茫茫。

食羊虎肉

白額咆哮振山谷，老羝見之驚且伏。一朝強弱兩不存，此肉都歸野人腹。腹中惟恐相啖吞，急呼美酒爲解紛。酒酣一醉更懷古，千載英雄羝與虎。

蕨箕行

並海饑民千百數，攜鋤上山斲山土。蕨根已盡斲不休，力絕筋疲未言苦。屋頭五日無炊煙，十步九却行不前。全家性命係朝莫，弱子假息阿母眠。昨日斲蕨

僅盈斗今日蕨根不滿手但憑斷蕨保餘生再拜青山感恩厚青山青山爾勿
猜明朝未死攜鋤來

海米行

海邊有草名海米大非蓬蒿小非薺婦女攜籃晝作羣採掇仍於海中洗歸來
滌釜燒松枝煮米爲飯充朝饑莫辭苦澀不下咽性命聊假須臾時皇天不仁
我當死況乃催科急如矢來牟擬作日月期欲保餘生更俟爾呼呼棄止不復
陳椎牛酣酒爲何人

遊峨嵋

楚客求丹梯沂流三峽踰五溪浙僧訪佛祖一錫凌空向西土江左儒生尋謫
仙相逢共上峨嵋巔峨嵋山高氣磅礴萬朵蓮開青插天天高地遠望無極海
東日出扶桑赤氣衝衲衣舉光搖角巾明眼底汪洋巨鼇動耳邊鬚髯天鷄鳴
龍宮對月窟曾聞謫仙遊霞光凝不散履迹今尙留千崖崩摧勢欲墮羽流縉
侶參差坐七寶巖留供佛燈萬松竈起燒丹火風霆蕩瀟雲樹模糊虎豹接迹

猿猱鬪呼星漢當頭手可摘靈芝甘露無時無雲漏日兮光一線金蓮白象兮
紛紛而來見萬籟動兮天樂和仙之人兮夜經過忽神驚而目眩豈事幻而說
頗覩謫仙而無有杳鳳管與鸞車塵心未斷懷鄉士青鞋復踏來時路行行回
首語青山石室無鎖門無關重來有日當躋攀肯效趙趙嘯嚙徼名勢坐令塵
土凋朱顏

題萬間室

少陵老翁餓瀕死意欲大庇天下人一椽茆屋不足蔽風雨安得萬間之廈蓋
覆四海赤子同欣欣言狂意廣不量力至今世俗聞者交笑嗔侯城小儒愚獨
甚不敢嗔笑謂公之意厚且真古來致亂皆有因大臣固位謹持祿其計止爲
安一身高車大纛耀侈富子女玉帛驕里隣安危得失百不知更僭膏腴便利
田宅遺子孫生靈窮苦墮溝瀆寒士困悴無衣紳彼也珍羞綺席歌舞燕樂窮
朝昏老翁哀痛實爲此熟視鄙夫儉子辟之犬鼠加冠巾曰我得志有不爲嫉
邪憤世欲救其弊忘貧賤至今已閱八百歲知翁之意世獨少蹈翁所惡常紛

紛侯城子爲是懼人受天地中何以不與禽獸草木爲等倫一心運萬化五性
涵義仁下補后土所不能上贊皇天之闕燮調寒暑撫五辰大禹疏百川伊周
綜理禮樂政教與世爲陶鈞孔子孟軻不得位著書明道亦與治水拯世之功
均吾爲孔子徒忍汨流俗同沈淪故題一室曰萬間坐覺宇宙亭毒氣勢皆前
陳身賤不敢論政教誓將修復孔業爲世開昏囿室中左右列古書亦有諸史
所筆志義之士忠良臣關有子厚洛有伯淳羣公近出皆鳳麟美哉子厚西銘
之說何諄諄吾恐當時亦感悲歎意故立此論可與日月同光新爲君不知此
無以建皇極爲臣不知此無以康兆民願寫此書千萬卷洗濯鄙陋與私智使
知林林之衆皆吾共出而同娠視之不至越與秦盡變呻吟愁嘆之俗若去寒
沍逢陽春小儒不惜獨困處此室作爲雅頌歌聖神再見中國大治同周殷

滄州趣爲台城趙生孝禮題

少年負奇志味道輕神仙縛虎千仞崖斬蛟萬里川東指扶桑西月窟以手捫
天問天闕醉中欲奪羲和鞭驅策六龍下溟渤歲華忽復晚奇功竟無成恥作

楚狂人甘爲魯諸生俯首蓬屋中被褐勤六經憂多髮白早觸事萬感盈擬從
安期輩採藥遊蓬瀛蓬瀛羣仙別來久聞知掉頭還拍手世上憂勞早已知身
後功名復何有棄我如敝屣不肯相攀援登高發長嘯目送白鶴歸三山我友
王子喬示予海嶠圖孤峯拔出數千尺丹光雲彩交模糊下臨無地上極無天
漚波浩蕩望不極恍若巨鼇掀舞勢與元氣同回旋金銀宮闕隱倒景翠綃絳
節在眼前對此愜心賞便欲乘風與俱往恨乏同心人臨岐獨惆悵趙生天資
妙訪我東海頭清談雄辨有仙趣坐覺毛骨寒颺颺生方讀書取青紫我已屏
迹棲林丘他年謝事倘相會與爾共作蓬瀛遊

許氏龜巖行

寧海許子名續字士成年踰三十事母以孝稱士成六歲失嚴父母氏祿抱避
亂慈溪城于時鯨鯢奮擲東海沸紅塵滿天波血腥流離異鄉幾寒暑慈母守
義志節如霜明盜平歸來閭里驚母能愛子復善教紡績衣食使入庠序拜揖
從先生所學在大倫恥以文藝鳴家居近市母不樂又爲迎至龜巖之下養且

耕兒壯母髮白諸孫長大能扶王母行士成歲時奉觴爲母壽踴躍拜舞同孩
嬰食有黍稻穀有牲母氏感舊涕泣難爲情士成念母守節苦身賤莫達天子
廷每爲鄉閭道母事辭旨悽咽弗忍聽縣令不之察郡守不爲聞朝家有命誰
能旌悲哉士成之恨何絲平嗟嗟今之人豈無高車大馬垂華纓推恩及父母
丘壟沾光榮立身奉法不能謹雖有恩寵無絲承身死汗辱增宗族愧醜父不
願以爲子弟不願以爲兄孰若士成隱居不仕行修于家馳令名龜巖土厚且
沃龜巖水甘且清龜巖之人誰與許子京許子之賢母所令鄉人祝許氏母子
年百齡母爲人婦法子爲事親之準緇嘉爾母子孝且貞龜巖之高與天俱不
傾樂哉士成配巖永久流芳聲

蜀道易有序

昔唐李白作蜀道難以譏刺蜀帥之酷虐厥後韋臯治蜀陸暢反其名
作蜀道易以美之今其詞不傳臯雖惠於蜀民頗以專橫爲朝廷所患
暢之詞工否未可知惟其意蓋不過媚臯云爾非實事也伏惟今 天

子以大聖御極殿下以睿哲之資爲蜀神民主臨國以來施惠政崇文教大賚臣僚及於兵吏內外同聲稱頌喜悅天下言仁義忠孝者推焉西方萬里之外水浮陸走無有寇盜商賈駢集如赴鄉閭蜀道之易於斯爲至矣臣才雖不敢望白而所遇之時白不敢望臣也因奉教作蜀道易一篇以述聖上及賢王之德名雖曩暢而詞無溢美頗謂過之其

詩曰

美矣哉西蜀之道何今易而昔難陸有重巖峻嶺萬仞鑿天之劍閣水有硤雷掣電懸流怒吼之江關自昔相戒不敢至胡爲乎今人操舟抹馬夕往而朝還大聖建皇極王道坦坦如絃直西有雕題金齒之夷北有氍裘椎髻之貊東南大海際天地島居洲聚千萬國莫不奉琛執贄效朝貢春秋使者來接迹何況川蜀處華夏賢王於此開壽域播以仁風沾以義澤家人裕彙兵斂革豺狼變化作騶虞蛇虺消藏同蜥蜴鑿山焚荒穢略水剷崖石帆檣屣履任所往宛若宇宙重開闢美哉蜀道之易有如此四方行旅絡繹來遊西覽德成都萬室

比屋如雲桑麻蔽原野鷄犬聲相聞文翁之化孔明之仁嚴鄭之節楊馬之文
遺風漸被比鄒魯士行賢哲方回參方今況有賢聖君大開學館校論典墳坐

令致化希華勳徵賢一詔到巖穴咄爾四方之士孰不爭先而駿奔王道有通
塞蜀道無古今至險不在山與水只在國政并人心六朝五季時王路嗟陸沉
遂令三代民盡爲獸與禽當時豈惟蜀道難入荒之內皆晦陰戎夷雜寇盜干
戈密如林今逢天子聖賢王之德世所欽文教洽飛動風俗無邪淫孱夫弱婦
懷千金悍吏熟視不敢侵蜀道之易諒在此咄爾四方來者不憚山高江水深

爲玉泉山人題

天地直接扶桑東百川委會來無窮兩崖爲門障海口大江中流潮汐通豐山
橫鷺東奔放浪嘯沙崖穿玲瓏翠鳳飛來白銀闕金鼇湧出金蓮宮天台赤城
此磅礴間氣往往生英雄鴻儒碩士世不乏神靈秀異天所鍾玉泉山人獨嗜
古食貧力土專而工結廬椒江望蓬島坐看海氣浮青紅含嚼英華嗽芳潤吐
納光景噓長虹羣仙窈窕羅几席洪波浩瀚涵心胸叢爾一鄉不滿意邈焉四

海將奚從日披黃卷對賢聖上並周孔齊義農國風雅頌導于正典謨訓誥操
厥中權謀智術競趨利玄談清議咸歸空濂洛崛起樹名教千載道學開盲聾
仁義行師佐伊呂禮樂出治登夔龍拯救生民布仁化此心炯炯今昔同食息
夢寐若見之上下議論相磨礱論交豈止一世士直追三代還淳風屈伸去就
隨所遇仕止進退皆從容某山某水吾釣遊歸來舊隱巢雲松

次河南府梅花堂韻

前年停車汴水陽鄭公延我政事堂是時梁園花亂發遊蜂乳燕春滿牆綠酒
浮觴面玉白繡衣耀座腰金黃豈知造化不容物俊傑俄爲土中骨重來訪舊
無一存冠蓋年華兩飄忽堂中遺跡傷人意粉圖素壁銀鈎麗道廣常懷濟物
心數奇竟負匡君志文章爛熳空自苦政術廉平索誰繼官僚薦書嗟我遲妻
子思家歸未遂感此臨風涕淚垂出門上道風塵翳西行境內五百里到處逢
人稱善治洛陽城中迎歲新正思昔日梁園春河南忽過張少府意氣還同鄭
老真蠟梅盈庭花璀璨銀燭照夜光璘珣登高訪古隘八極勸酒笑談驚四隣

被我虛名浪羈束奔走皇皇炊不熟明朝又度瀉水西行李再經燒棧北丈夫
會合當有時各展忠貞報王國

東河驛值雪次茅長史白戰體韻

東河氣高地常冷越客入山愁日暝蹇驢破帽闖驛門敝屋疎籬耿燈影更闌
藉草始一寐夜半雪來初未省窗明恍訝烏繞樹身倦宛同蛙伏井鷄鳴起看
眼生花睡熟山童呼不醒積深已覺擁藍關勢遠直疑沾庾嶺穿簷入隙如有
求塞戶填堦豈須請瓦溝早滴爲炊煙水面難消因泛梗樂事偏宜壯士獵清
氣先入詩家茗平鋪道路混險夷蓋覆乾坤掩瑕管空山難行無客到高臥閉
門終日靜春來一月尙嚴凝天上何人調九鼎半生對雪走四方奇絕愛此林
壑景長松壓重龍虎怒巨石羅陳
整北風末勢更飄揚斜照餘輝愈光炯
南望殊憐京闕遙西顧頗覺歸途永未須翫物遽憂患有形易化皆幻境明朝
陰翳盡掃除天際諸峯翠相並乘興伸眉且一笑人生饑寒非不幸莫將詩句
效蘇公淮陰詎肯儕噲等

愛日堂

白日麗青天朝出扶桑莫虞淵堂上有親雪滿巔坐看白日心茫然長繩不可繫急景如流川義和義和停爾鞭高堂一日如千年

寄貧

朝餐漿一盂莫食蔬一盤胸中六經粲星斗筆底萬卷馳波瀾人笑先生窮不恥先生嘆人愚可鄙終朝醉飽百不知何異腥羶飫螻蟻世上羣兒昧重輕每是螻蟻非先生縱令先生窮至老猶與日月爭光明

覽以德用中二友和東坡喜雨之作

席前衿佩多如雨危坐談經亦良苦講堂日宴未朝飧舌捲唇黑面生土小齋退食開屏門倒屣起迎咽還吐知是兩賢送詩至笑却杜康麾陸羽錢也駿馬氣莫當陳也奔泉勢難禦元祐詩壇不易登俱欲升堂啓其戶文章絲來關政教道術何曾聞今古每憐陋儒不自量詆訶前人竟奚補浪與唐宋較優劣有如癡兒侮厥母蘇公風骨真天人駭視四海手摩撫二南洋溢騶虞出九韶鏗

鏘鳳凰舞列僊得道行御風漢相閑居老食乳神奇變化脫邊幅怒罵嘻噦皆
新語眼中不復見此翁雲月江山澹難主我狂自少喜翰墨辟若惰農服田畝
嘆彼么麼星辰出望公光燄日當午二公豪健敢攀附蓄積穰穰富倉庾大篇
屬和意有餘坐覺詩名動城府當今聖朝任英俊雅頌再作聲教普吾衰才薄
子勉旃振起斯文繼前武

渡淮後寄宗文先輩及諸士友

長淮風顛浪雷吼爭渡千人喧渡口蹇驢破帽衆所輕行李甘心落人後臨淮
先生交義深視我重比雙南金席前弟子總英俊相攜擁餞淮之陰就中孫圮
藝且勇奮袖登舟氣增重扶顛禦侮况有人病身幸免波濤恐掛帆長嘯煙霧
開主人謝客緣城回孫也追隨不憚險艱危可仗真奇才世俗結交看勢利有
勢相依無卽棄賤貧如我豈足憐脫落凡情見真意賢豪邂逅何所無排難多
絲奇丈夫古人事業望公等欲輔國步須損軀

次鄭好義紀夢韻有引

昨承寄示紀夢長句諷詠之餘不勝感歎因用增至二十五韻以道鄙懷答雅意尙正教之

奇材偉人世不作太息斯文付冥漠承君忽枉紀夢篇喜極長吟淚交落雄辭
璀璨迸星斗險語鏗旬飛電雹念我雖知意氣真感君復使情懷惡憶昔與子
在京師玉堂老僊侍幃幄冠蓋追趨禁闕深朝廷尊寵禮數渥聲名如雷動天
地震起螫蟲伸屈蠖國有著龜民有師水之海濱山之嶽升堂執業集英彥寶
帶朱衣雜南朔朽材浪跡偏見憐繩墨匡持重龔斲子時好修美文藝清談劇
辨相娛樂公於多士雖並收視我與君尤不薄龍驥咸歸伯樂廐天球本出荆
山璞要爲國家樹基址屬望吾人興禮樂安知垂老萬里行直泝岷江踰劍閣
死生契闊恩義乖音書隔絕道路邈索居臥病東海上舊德棄捐徒歎作夢中
見公疑尙存雅度高風儼如昨公之神明在宇宙陟降照臨焉可度或乘鸞鳳
驂麒麟或奏韶夏陳羽籥鈞天清都足豪俊講道論文恣歡謔應悲我輩混世
塵俛首顰眉語伊嗻獨念靈櫝客西土明詔未許歸故宅昔蒙召見欲奏論造

次自疑難感格 聖君霽澤覃萬方寧使遺骸葬夷貊子文無後善人懼馬遷
有書心事白所憂陋拙忝知己昭雪孤忠負前諾公心豈不望後人入夢語子
意甚確子兄文章極醇雅典國製作名烜赫爲銘功行播遐邇可配史傳垂簡
策子將繼踵縮章綬便當任此千古託如吾自料乏時才空言駭世徒宏廓水
北山南結茅宇弟唱兄酬老耕穫著書倘可寓王制未死尙期明聖學與子他
年擬見公公歸應化遼東鶴

寄修德

平生識字不滿百浪竊聲名有慚色反觀身世每自鄙何以使子心莫逆前月
馳書許訪我恐我無錢厭賓客惠書問疾繼踵來爲賀更生重淒惻我力不能
事耕稼性又不耐營官職承明辭歸茹藜糗侯封鼎食誰願易今年瘧鬼忽侵
凌寒熱交爭類勍敵垂頭伏枕二十旬腰腹枵羸面如腊嗑乾特粥不善飯下
牀須扶還按壁向來意氣隘九州頃步顛躓真可惜所忻元兄督家政甌石無
儲免憂戚抱書歆臥困卽眠見客暫起饑輒食萬事盡拋思慮表一身豈卹饑

寒迫古來賢豪例窮苦屠兒販豎千金殖皇天子奪有深意衆生淺闇何繇識
君來不須念我貧厭飲仁義非外得薄田近獲十斛麥炊之作糜可朝夕溪南
磐石廣數仞牆頭新筍高百尺竹間讀書石上臥青雲爲蓋苔當席頗聞海上
有巨鼇鼓舞洪濤氣腥黑請君持竿亟一掣膾肉作脯如山積盡俾黔黎飽君
德與君大嚼醉千日免使窮愁惱胸臆

送劉士端歸括蒼

憶昔高皇定華夏海內遘屯龍戰野幃幃謀謀三數公君家中丞最瀟灑軸轡
十萬搗虛來帆檣蔽空聲吼雷從容決策掃強寇手扶日月滄溟開盜犯洪都
突彭蠡砲石星流湖水沸御舟閣河諸將譁神箭穿顛逆酋斃是時中丞謀略
精指揮英傑江南平掀髯撫掌談世事天子稱善羣臣驚寰區混一定勳賞鐵
券金符頌土壤中丞獨擅翊贊功賜號每爲諸司長青田宰木三十年高皇僊
馭亦賓天國初故老尙誰在幾人事業圖凌煙忽見聞孫三歎息秀目疎髯遺
像逼擬樹豐碑墓道邊欲請天朝重褒錫至尊含笑問近臣先帝功臣今有孫

胡爲拂衣入山去，盱食未敢干君恩。海內只今無盜賊，幽州與兵惱邦國。廟堂謀議豈無人，我懷中丞淚沾臆。嗚呼志士古所稀，留侯武鄉今是誰。九原招公倘可作，爲解四海蒼生危。

題王節婦

妾入君門知有夫，夫雖不幸夫子孤。人生必死死卽已，大義一失將安圖。爾有金如山，我有心匪石。頭髮可斷頭，可得死報夫。奚所惜，幽哉猗蘭芳在彼。澗水湄，荆棘非不繁。永終保令姿，千秋萬載苟可滅。白日成塵海成血。

楊節婦

良人贈我明月珠，永託團團誓無違。豈期生子髮未髻，竟以王事捐其軀。妾身旣作楊家婦，撫此孤兒事堅守。明月之珠深自藏，千金不落他人手。青絲髮斷今復長，妾心直與珠爭光。推門鬻市卒不售，死將地下還阿郎。玉堂學士文章伯，爲發幽貞播金石。千載少似曹家妻，凜凜遺風可相敵。

題許節婦傳

渭水不可濁豈與常流俱節婦不可辱自與常婦殊節婦之節良可書書出大手名斯垂嗚呼奇花異卉人難植瑞麥佳禾不可常種得

寫懷

子規聲裏吳蠶熟星繭纍纍照人目踏車已作春雷鳴我獨無人冷機軸繭老蛾飛爭奈何愁端零亂如絲多故人一去不復返徒有血淚如春波新婚已盟未諧耦青鳥傳音在春後青春會少離別多心事殷勤向誰剖君不見古井淵源百尺深欲汲未得勞人心井深百尺君莫恨但恨繩索無千尋

聞鶉

不如歸去不如歸去一聲動我愁二聲傷我慮三聲思逐白雲飛四聲夢繞荆花樹五聲落月照疎櫺想見當年弄機杼六聲泣血濺花枝恐污堦前蘭茁紫七八九聲不忍聞起坐無言淚如雨憶昔在家未遠遊每聽鶉聲無點愁今日身在金陵上始信鶉聲能白頭

律詩

懿文皇太子輓詩十章

威德聞中夏黎民望彼蒼少留臨宇宙未必媿成康宗社千年恨山陵後世光
神遊思下土經國意難忘

文華端國本潛澤被寰區雲繞星辰劍春回造化爐變通周典禮寬大漢規模
厭世嗟何早蒼生恨欲枯

監國裨皇政憂勞二十年龍樓方愛日鶴馭遽賓天已失羣生望空餘萬世傳
長江一掬淚流恨繞虞淵

相宅圖方獻還宮疾遽侵鼎龜懸寶命笙鶴動哀音誰紹三皇治徒傾四海心
關中諸父老猶望翠華臨

三朝兼庶政仁孝感嬰孩萬歲千秋志經天緯地才未登宸極定忍見泰山頽
聖子承皇業能舒四海哀

懿文光典冊善美過昭明曆數歸元子哀榮慰聖情神靈遊帝所陵寢鎮天京
公論當時定千秋有頌聲

虹光流渚日五馬渡江年聖質中興運天倫位正傳德隆尊未極仁與壽難全
餘慶垂中古皇家世有賢

淵默師成憲端嚴信若神承天行日月與世作陽春銳意思寬政溫顏訪老臣
至今江海士猶想屬車塵

六龍猶未御萬物已昭蘇使處尊崇位應無凍餒夫不知天上樂還憶世間無
八極遨遊暇踟躕顧帝都

斥土開瑤殿因山近翠微神輿離鶴禁天淚濕龍衣日月還丹闕風雲送六飛
太平皇業固清廟詠光輝

右十詩蓋以寫臣子之至情而寓攀號迫切之意未嘗敢以示人今以
記事靈殿適舍弟以諸生來見感泣乃書以與之然辭之卑陋而事之
隆重身之疎寡而道之崇高宜其不足以形容之也

大行皇帝輓詩

睿哲君天下恢弘德化新宵衣圖治道側席致賢臣王氣金臺曉仁風玉宇春

忽朝雲晏駕率土淚沾巾

謝蜀王撫問賜藥六首

有序

臣伏承睿恩撫問兼賜良藥及臯比講席拜受之餘無任感荷敬次滕
訓導所寄詩韻粗述瞻仰之誠辭句蕪拙乞垂宥察而正教之幸甚

超悟天人際從容禮法中毫端錦江水塵尾雪山風善共東平樂才看冀北空
感恩慚獨厚箋疏許頻通

壤地三千里絃歌五十城廷多漢長者座有宋耆英立事多師古行仁不近名
願存無逸戒佇見治功成

聽政憂民切虛心待士虔典章皆有據談笑總堪傳夜月初筵酒春風廣廈甍
小臣懷德處每憶白駒篇

大名傳海宇盛德冠時人文字天垂象姿顏嶽降神仁施邦域遠年與憲章新
願沐恩波闊花溪理釣緝

賢王思賤士欲爲制頽齡藥授還丹祕功存本草經駐顏嗤鑷白閱歲比冬青

倘遂飛昇去長依傳說星

服猛本王政賜皮書閣中林泉眼如電文采座生風似可講周易寧須喚小空
深思避賢者玄理未能通

應召赴京道上有作三首

搖落秋冬際蒼茫艷越間青山欹枕過白鳥背人還問俗鄉音異消愁酒價慳
虛名果何物不使病夫閑
官程催歲暮百尺可停牽煙浦高低樹晚江來去船青山過越少滄海帶吳偏
所遇無親舊懷人興眇然
客路喜暄暖初冬天始寒近京風俗異逆浪水程艱人語吳音雜漁歌楚調酸
畏途非好友懷抱若爲寬

病中述懷二首

臥病知爲國尤須謹未形成強多過計安逸每傷生變理宜修政醫治乃用兵
但令元氣固四海樂昇平

啟交憐抱病意厚數相過憂患人難免方書俗易訛衛生功莫就醫國理如何
但喜心無恙斯民疾更多

送盧信道漢中點兵

喜子東南秀炤人眉宇清早探經濟學已負老成名治世難忘武邊城要足兵
關河雖跋涉歷覽快平生

題萬間室

一室纔函丈何緣號萬間靜中存太極圖裏看人寰舒卷心無外經綸意自閑
誰能同此樂魚鳥亦歡顏

題曲徑

曲徑潛通市高墉遠背村醉眠忘作客靜讀懶開門古學嗟中絕羣經續已繁
平生刪述意深恐負乾坤

次韻奉寄好義四首

真齋至出見寄詩甚慰懸渴諷詠不能已因借韻述懷邑中還同宿偶

作一首今并錄上

初旭濕霜痕溪流緩復奔路因頻到熱心待舊交論山勢隨村曲窳烟接海昏
知君多善教所至俗還敦

聞說幽居僻仙鬢翠峯南陽坡饒美木曲澗會澄潭問俗何方古藏名此地堪
深期帶經往清夜擁爐譚

野性便時棄虛名恥世聞目緣多慮暗志爲好奇分傍日翻書卷臨池寫練裙
思君同雅興搔首誦停雲

混俗非真隱深居學避鷲看雲山映竹坐石水通潮道勝貧何病神完趣獨超
遺經對千古意頗似聞韶

草沒堦前石雲連戶外山位居人下拙身在病中閑出處多難事逢迎有瘦顏
仰看雙白鶴暮向遠林還

歲暮寄王修德先生二首

杪歲垂垂盡寒花悄悄繁律回春有信冰動水生痕樸學漸經濟窮居廢討論

都將百年意一笑付乾坤

長嘯茅齋窄清談酒盞空天寒爐擅寵歲惡甑無功計拙居鳩上身癯訝鶴同
燈花笑愁絕故向夜窗紅

承宜隱友兄同還精舍賦短律五首爲別

風檻臨溪敞幽人稱隱居高松偏宿鷺濁水最多魚隣父邀嘗酒鄉豪笑著書
時艱知己少來往莫教疎

攜友踏溪沙同尋隱者家雨多知損麥土暖喜宜瓜身願明時棄文慚世俗誇
旅懷難一笑撥遣付流霞

於世吾何補論心子最知叫關他日恨感事百年悲地主能投轄天閑幸脫羈
談經深夜坐涼月在清池

情深難遽別送遠却同歸衣濕灑塵雨路經垂釣磯山童迎客慣國士似君稀
且復聽雄辨前賢賴發微

千載康成學羣賢惜異時典章秦火盡禮樂漢書疑聚訟吾何敢承家子莫辭

從來參筆削萬一補民彝

次韻答錢文學二首

幽亭斜日在佳興與君同
屐潤催詩雨衣涼醒酒風
鵝羣穿草白蜂足帶花紅
愁散身殊健全寬雲夢胸

雲山留客住尊酒賴君同
炤影林端月清心水面風
醉書詩草黑笑剪燭花紅
不是聽雄辨難消磊砢胸

題畫二首

得意支郎畫分明是米家亂雲浮
雜樹遠渡臥枯槎白屋孤舟迴丹崖
一徑斜何時共漁叟洞口訪桃花

曲折成千里雲山儼一鄉
林疎茅屋見水落釣舟藏
世路羊腸外仙家鳥道傍
此身何處着箕穎意難忘

寄童伯禮二首

俗薄吾深厭家肥子孰過
孝慈諸弟共才俊一門多處世
難同衆居鄉本貴和

古來修禮讓盜賊尙投戈
黍肉屢來饋寸心殊自憐
傷廉增我過尙德貴君賢
握臂知身瘦捐書待病痊
每懷徐孺子衰世道能全

催菊

蚤帶春泥種頻添沃壤培
如何九日至不見一枝開
時過花何補天寒客懶來
便須連夜發莫負掌中盃

代菊答

生意本天得無人亦自芳
但能娛晚節何必媚重陽
服食多延壽風霜獨擅場
祇應夷皓輩心迹可相忘

過北山翁

避世慚無術忘年賴有翁
山中九日後花下一尊同
江迥宜秋色林疎怯晚風
放懷甘取醉舍此更誰從

送鄭履順二首

病臥思親友幾人能見過天寒念我至風義覺君多取士周三物論才魯四科
相期曾閱上歲月莫蹉跎

學是千秋事文非一藝卑古來傳道術誰免假言辭魯史三王政周官百世規
知君美才氣慎勿負深期

峨眉縣曉發次韻

渡水籃輿穩穿林草徑微勝遊方外得樂事世間稀風過軟僧笠雲來掛道衣
山靈應待久好去莫相違

謝羣公送別

賤士何須送羣公不世情聽雞朝謁後並馬出郊行心戀金門遠身依玉樹榮
愁來今夜月兩地向誰明

道中遇盧先生

先生獨無慮作客竟忘歸謾把詩書閱寧知世事非秋風吹落鴈江樹隱斜暉
少立橋邊路相思恨久違

春和五首

幽人遊澗谷芳譽動京華暫食高山蕨終簪上苑花醉歌辭激烈老態影欹斜
願得萬間廈轉爲寒士家

山深諸藏殖海廣百川歸材蓄廊廟器文張錦繡機魚龍將遠化鳧鶴漫齊飛
爲愛賢名久人間萬事非

慨余徒就老羨子早馳名幽谷遷鶯語九臯孤鶴聲課蒙聊給膳教子力勤耕
身世相忘久山猿總不驚

念子身宜隱憂時志復存騰章吐豪語索句發奇言燕雀爭栖鬧豺狼鬪食喧
寧知陶靖節適意向田園

鄭生瑚璉器曾住此林丘死骨今埋土新阡誰樹楸百年愁莫遣一夢樂誠優
惟念雙親老無能爲爾謀

寄處州教授蘇平仲先生四首

懷舊輕千里無書遠七年論心思盡地會面極升天名重連城價文雄萬斛泉

何時絮卮酒紀德浦陽阡

舊習深知誤虛名久自羞故人猶比數文苑昔同遊
婺女遺言絕胡公學制優
料君施善教才俊滿南州

蘿山同業士存沒兩無聞未盡人間用寧修地下文
劉郎應屏跡鄭谷自清芬
搔首看征鴈天寒遠索羣

昔過東陽縣知君近始來留詩徒屬和無計復邀回
賴有梁園客同傾杜酒盃
死生星散後感舊復憐才

二十九日三首

揮淚劬勞日持觴孝義門敢承千古托恐負二親恩
善頌慚諸彥傷懷望九原
寂寥生意盡空愧此身存

野人哀感日天子戊辰年已負懸弧意空吟陟岵篇
病身難報國歎歲欲求田
築室依先隴將心訴九泉

就木悲賢傑持家賴哲兄三人嗟莫並一世竟何成
毀壁千秋痛看雲此日情

遙憐小兒子念我倚欄楹

遣病十首

冬瘡春仍壯身羸氣覺虛
腦乾祇食粥眼眩廢觀書
行步兒童笑形容老病如
平生千古意獨在悶難舒

病疴當歲晏冬去病猶存
氣弱翻多汗心虛苦畏喧
此生應有命萬事可忘言
向晚移書卷微吟臥負暄

底用憂微疾人多悔久生
危機非吠畝高枕豈公卿
千古斯文託羣經此日情
廢與天命在得酒且須傾

急雨張燈夜匡床伏枕時
食貧宜客少身病願春遲
道豈斯文著才非聖世遺
用心耕鑿外榮辱竟何施

久病諸人問深居四壁牢
故交貽善藥烟姪饋醇醪
閑厭虛名絆貧知古道高
時來稍暄暖斟酌減綈袍

二月風猶勁寒生滄海波
呻吟知夜永羸憊損天和
行覺冬衣重眠妨夜食多

百年強壯日排悶付高歌

出戶迎人倦投床散帙迷牽衣嗔穉子煮藥愧山妻葛令尋勾漏梅生入會稽
病思方術士亦似咀雲泥

春風已兩月閉戶不相知百舌強言事衆芳空滿枝官途多世難臥病亦天時
應有簪纓者低頭羨我爲

飲酒留盃底攤書礙枕旁人扶修冠櫛客勸罷文章穀雨催田父花時到海棠
病夫渾不較流轉任春光
病久身渾憊醫疎術易窮囊空宜勿藥跡滯尙飄蓬禮樂周秦後乾坤橐籥中
數行憂國淚江海與俱東

童景純來二首

千古劬勞恨三冬瘡癘餘故交猶記憶尊酒問何如拜倩人扶答文教子代書
何時減藥餌一笑百憂除

欵枕雨聲歇竹間聞鳥鳴病惟愁是伴閑與懶相成墮地驚茲日終天負所生

一杯魚菽祭悲感淚縱橫

贈鮑民瞻

學道懶言文君文思不羣雪消三峽水波漲一川雲出處存爻象經綸在典墳
莫名詞苑傳須立濟時勳

哭吳樗庵先生五十韻

夫子嗟淪喪鄉閭頓寂寥百年遺老盡一代典刑銷在昔朝廷感諸儒學業饒
著書磨歲月抗論切雲霄獨步才偏壯清時俗未澆翟門人競集鄭驛客嘗邀
冠蓋來千里牲牢具一朝柳營嘶駉憂茗椀捧妖燒家釀傳荷葉溪鮮貫柳條
醉猶親簡策樂不爲簞瓢晚節趨王命顰眉逐使軺將軍開幕府畫諾任賓僚
燕薊藩翰重兵戎節制遙宣威增國勢褫魄避天驕絕漠清烽火前驅奏鼓簫
歸田心戀戀解組思飄飄松菊猶堪理桑榆幸未彫散金思效廣擊壤願歌堯
紗帽長蒙首銀章懶束腰吟哦今李杜吐納古松喬勝會無虛日清談或屢宵
小心親里閭避咎狎漁樵名美偏招謗年高未免謠鬪牛喧孔雀孤鶴畏鴟鴞

媚寵慚何枉懷沙恨莫消事隨東逝水迹斷舊題橋素櫬還家慘總麻聚哭豈
可憐嬰世網本不負天朝威德知誰繼冤魂謾擬招園林春黯淡風雨暮飄飄
致遠悲良驥搏空憶皂鷗聞喪皆頓足知己自垂髫秀句時稱賞華筵必辱要
吟成珠滿紙坐久斗回杓適意魚依藻搜奇翠映茗劇談衾每共痛飲燭頻燒
髮爲工詩白心緣慮患焦豈知埋玉樹常想報瓊瑤劍許何當掛琴存久不調
已同麟斃魯空待鶴歸遼官忍題朱旒家聞賣黑貂徑荒泥蚓出池廢雨蛙跳
隆替天難問災祥理匪昭聖賢從古數憂患幾人超女在難同蔡身危不類晁
知音俄頃失抱疾轉無聊蜀魄三更月胥江萬古潮誰能名季札應解訴臯陶
痛絕生芻奠哀傷壞木謠空齋暮聞笛揮淚向風颿

次危紀善五十韻倍成千字獻蜀王

有序

臣幸侍燕閒叨陪論講於道德之奧雖未敢窺然不可謂不知其一二
近閱危紀善五十韻排律詩因次其韻意有未盡輒復增加厥數倍之
成一千字上進蓋以紀事實而昭聖世之盛美非欲效詞人墨客以靡

麗爲工也伏惟賜覽觀焉

曆數歸真主皇威定八荒奉天頒正朔截海統封疆建國遵姚姒貽謀鄙晉唐
德星臨井絡全蜀仰賢王白日開金殿紅雲綻繡裳輿圖文獻域城闕武擔陽
地秀多才彥田腴足稻粱十年藩輔重萬里幅員長南土通滇楚東陞帶沔湘
周封元過楚禹貢舊稱梁盛德超中古高名冠四方擎天爲柱石瑞世比鸞凰
禦衆樞機簡臨朝禮貌莊正冠居便座決事處齋房實踐循規矩精思入混茫
小臣名盡記直士諫無妨該博尤知要英明匪過剛羣書陪几席前哲儼羹牆
旦奭宜方駕間平合侍傍事神孚胎嚮欽聖祝穹蒼講學心無逸憂民意不忘
陳經黃閣老問俗白髯郎不洩親毛穎知微却杜康青雲隨鶴駕紫綬列鸞行
漢代規模大周官法制詳懿親思魯衛洪業重高光師古人爲鑑存心禮自防
不知千乘貴惟恐一夫傷餓殍虞填壑流民閔陷羌冰縑贖賤穎玉粒飫饑腸
但欲調黎庶寧辭罄積倉分曹具饘粥隨處集羸尫有噴羣聲沸相攜蹇步躑
胥靡無橫天盜賊恥相攘恩出蠲租令歡騰施藥坊嬰孩頒穀養耆耄賂賜棺藏

故老偏優禮先賢盡表章中興想劉葛佐運念關張擬植千尋柏還栽八百桑
廟堂新邃宇劍履列長廊杜李重輪奐花溪頓煒煌齊名圖至白接武配蘇黃
善政俱修舉仁聲遠播揚較人馴狎虎膳宰縱河魴要使天心順寧教物命戕
至誠通造化惠澤及飛翔淵懿真堪述謙恭莫肯當崇儒先五教建極重三綱
開館延耆艾隆師錫篚筐衣冠儀秩秩絃誦韻洋洋執業諸生衆求書使者忙
九流分插架萬卷載連檣樂善人心悅無爲國本強虛懷臻聖域騁步領文場
揮翰銀鈎活摛辭玉佩鑿鼎彝皆國器蘭桂本天香觀妙言逾富研精食靡違
日惟親孔孟性不惑姬姜軫念窮邊地垂情健卒糧撫身無凍餒遇敵必騰驤
解語疎鸚鵡長鳴歎驢驢劬農興耒耜寬法絕桁楊當代真希遇前王或未嘗
泰山高莫並瀛海浩難航麟趾耽經史龍衣佩瑀璜笑談溫玉色追琢燦金相
肅挹尊賢傳端居喚小璫已能通魯語正可齒虞庠玉樹連枝秀瓊葩奕葉芳
骨奇瞻日角派近識天潢舉措存寬厚蒐羅必俊良聚賢頻設醴寶訓舊明堂
末學逢昭代平生服令望承顏初見日屈指九經霜術類千金帚榮過七寶牀

敢期運作炬每飲蔗爲漿身賤思疑病言高點類狂汗顏趨紫闥馳夢落滄浪
心怯恩波闊人誇寵數彰賜衣頻跼踖前席屢徬徨授簡安能賦開筵特命觴
偶同華屋燕徒飽大官羊雅句褒彌重微軀感莫量聯篇舒錦綺一字重琳琅
憶昔憂居堊陳情訴陟岡奎文昭孝行宰木發光芒寵異兼存歿風聲別否臧
望林掄杞梓占斗拔干將知己恩偏渥希賢德甚涼何絲酬覆載深幸覲顛昂
喜見皇家威從知世運昌弓戈藏府庫道德固金湯政教依仁宅詢謀遠智囊
朝廷存鎮重夷狄敢飛揚誠可回天地心能協兩暘羣生蒙長養百谷屢豐穰
人傑生臯摯邦基過夏商九重延祚胤百世受禎祥磐石安宗社山河拱帝鄉
孤忠深佇望恭已贊吾皇

人日從蜀王登萬歲山

鰲首高臨紫極開五雲長日擁蓬萊嵩呼曾獻君王壽人日今從帝子來寶仗
鳴鞭金轡覆石牀御坐錦莓苔才華愧匪朝陽鳳飛蓋華陰喜共陪

宿峯頂次濟定韻

層崖削壁跨千重坐鎮西南勢獨雄元氣昆侖磅礴外祥光隱見有無中珠瓔寶佛留全相金碧樓臺倚半空縱是蓬萊并弱水清虛難與此相同

登歸雲寺閣

棲身丹壑總忘歸水閣頻登趣不稀雨脚斜侵耕叟笠苔花青匝定僧衣山餘積雪寒猶壯巖墮流星曉更飛卜築何當居此地玉堂金馬任相違

木皮嶺

自慚非佛亦非僊也宿丹崖綠樹巔曉汲衣翻草頭露午炊竈起木皮煙日離滄海三竿遠天厭烏紗五尺連頓覺眼前無俗物片雲飛過鳥爭喧

山中對景書懷

烏靴脫却換青鞋踏徧名山愜素懷虎嘯石頭風萬壑鶴眠松頂月千厓雲開面面峯如削谷轉行行樹似排湖海故交零落盡煙霞清趣幾人偕

宿新津寶花寺

百丈岡頭佛寺開晚涼按轡陟崔嵬落花亂逐溪流瀉歸鳥低衝馬箭回雲外

老僧鋤筍蕨樹根童子掃莓苔景清愛惜禪房宿不爲參玄聽講來

送吳主簿

關西短簿衆稱賢太華峯前坐五年心爲嫉邪曾奏事家因好客不留錢霜寒
茅屋鷄聲蚤月落江城鴈影翻此去京華遇鄉使好將嘉政萬人傳

次韻贈方圓巖山人

到處清泉可洗心禪機一指用功深任教東住復西住不改鄉音與梵音見客
喜爲青眼顧能詩懶效白頭吟近來識面峨眉上蘿月松雲得共尋

次韻兄調弟希政并柬鄭叔度二首

百年喬木陰當戶五畝幽居水映茅好古喜尋遺老問避喧懶與貴人交從兄
受學慚蘇轍與弟分財笑薛包孝友傳家得無媿聚蚊免使退之嘲
鄉閭儒術許誰加弟唱兄酬興味賒經濟有心慚薄德安居無事任貧家日高
甕牖蜂穿紙潮落江汀鴈聚沙却嘆離居趨侍日時來相對卜燈花

輓徐節婦

大節寥寥不可聞晚從吾郡始知真百年禮樂無男子一日干戈有婦人波冷
曹娥沉白骨兩荒剡嶺洗紅塵爭如烈焰三千丈高照青編萬古春

贈韓敏道先生赴召

先生樂道慕前人又被書徵覲紫宸詩卷已隨官棹月布衣還染屬車塵文章
共喜遭逢晚禮樂應知入問頻登眺鳳臺多制作郵筒珍重寄河濱

次韻留別陳季明先生二首

太丘美政漢稱賢高節英風四海傳垂白雲孫今幾葉汗青甲子已千年盍簪
重見星垂象落筆猶驚地湧泉恥以文章爲世用懶將辭色向人妍
每懷海上三秋別來借山中一榻眠妙論久容親講席深盃相勸惜離筵時清
共喜閑身健情重翻令別意綿他日朝廷訪遺老吹噓擬進白雲篇

絕句

枯木圖寄許士修

春到已多時幽禽尙未知上林無限好何事立枯枝

虎圖

踴躍谷生風，崢嶸百獸中。豈知王者瑞，足不履生蟲。

題山水二首

欲向匡廬隱，出門知路難。江山奇絕處，多在畫圖看。

離家今幾載，衣袂染京塵。不敢看圖畫，青山恐笑人。

題曹娥江

娥以孝而死，江因娥得名。至今潮上落，猶帶哭爺聲。

題竹月圖送太學生歸省

黃金臺上月，炤爾憶親情。歸去供甘旨，春林笋正生。

病中除夕四首

數漏掩殘曆，中宵氣候殊。獨憐愁共病，不與歲同除。

三十知未老，已難同少年。功名謝時輩，心事愧前賢。

里巷占新歲，皆云勝舊年。幾回新歲過，萬事只如前。

良醫難治病學道不能行瘧疾何須患吾心病未輕

題畫

茅屋東嶼西嶼白雲前山後山爲報溪頭流水落花休出人間

牧牛圖

谷口驚湍雨歇柳陰芳草春還試問太平樂事夕陽牛背青山

奉試靈芝甘露論

漢家圖治策賢良董子昌言日月光自笑腐儒千載後却勞聖主試文章

書事

伏枕三旬不整冠夢魂時復對金鑾忽聞盛事披衣坐今日朝廷立諫官

二月十四日書事二首

斧屐臨軒几硯閑春風和氣滿龍顏細聽天語揮毫久攜得香煙兩袖還
風軟彤庭尙薄寒御爐香繞玉闌干黃門忽報文淵閣天子看書召講官

試院偶題三首

柳影波光鎖院深一塵不到市聲沉多情惟有雙靈鵲時到庭前送好音
三代賓興法尙存每因取士嘆斯文近來眼病無聊甚豈復能空冀北羣
橋門冠蓋藹如雲才氣爭先總出羣自愧腐儒無一藝強顏來此較斯文

次韻謝蜀王六首

有序

敬蒙睿恩賜以篇什誦咏感媿次韻六首以謝

恩命許辭金殿直歸裝仍賜石渠書欲知懷德無窮意長望星辰想屬車
志似子淵方是廣才如曾點始爲狂自慚末學何爲者孤負恩言鬢欲蒼
幸瞻天下難逢德又讀人間未見書魂夢何嘗違禁闥深恩何敢忘巾車
德尊待士真忘勢位下憂民每悔狂明日岷峨應漸遠莫雲回首看青蒼
全德已看承道統雄才更復主詩盟欲知聖敬心無息願謁參前與倚衡
德勝東平弟與兄共誇樂國似蓬瀛近聞傳令安黎庶歡動山南十萬兵

侍世子奉獻蜀王十首

有序

臣謬以疎庸獲侍世子殿下硯席竊覩岐嶷之姿英偉之識度越于人

萬萬誠宗社之慶欲述鄙言陳民事人情物理之概少效忠懇以廣聰
明恨未果爲先作絕句十首以進伏惟益懋典學以副下情不勝至願
賢君德業本天成猶待修心道益明喜見儲王親筆硯更須講學近儒臣
味爽先求問寢衣三朝日日禮無遺古來世子能敦孝惟有文王最可師
祖訓昭昭日月新絲來治國本天倫令名要使傳千載仁政須教及萬民
炫日輝霞錦價高製成稱體小龍袍試看黼黻文章美須念蠶桑杼軸勞
金匙磔盃絳紗籠玉瑩珠圓顆顆同願采豳風歌七月要知稼穡重三農
農事艱難古所憐一生幾度遇豐年若非聖世輕租稅逐末何人肯力田
九經治國本修身身正方能鑒別人辯佞要知駑異驥任賢莫指玉爲珉
君王待士古來無令德高名滿八區濟美喜看賢世子已能端拱禮諸儒
去歲開倉賑餓夫今年下令活無辜東平謾說能爲善未識當時有此無
稅薄刑清見盛時民安田里俗熙熙欲求上古無爲治仁孝君王自足師

屢承佳果之賜偶爾成句并述所見以寄下情謹錄進上伏惟宥察
涪州丹荔擅時稱翠筐來庭色尙新獻罷未曾登玉案先教頒賜與羣臣
翠籠擎出殿門東受賜羣臣喜色同却笑開元恩未廣祇將異味悅深宮
尙食頻供素膳回金壺僊醞不曾開君王嗜道渾忘味佳果何勞遠貢來
無才慚曳殿門裾珍味頻嘗玉饌餘解道側生風味好惜非梁苑馬相如
九重勤儉恤民勞錫貢深思道路遙異味奇珍俱詔罷皇明家法勝前朝
病身趨召歷千山又見江城荔子丹竊食無功心有愧賜歸分與衆人看
園官愛果勝黃金一樹生成一樹心味美已知堪適口當思培植用功深
利欲頽波挽不回幾人沉溺壞靈臺要明聖道無窮意須仗賢王不世才
道術衰微幾百年陋儒無力愧皇天已看位是真王貴須使心承往聖賢
新製蒲鞭賜理官丁寧用法效劉寬好生要使民無犯示辱如寬也不難

無題三首

宮臣傳教造安車駕出金門賜舊儒優老免親藩國政入朝唯讀帝王書

山南桃李競春光食實年年在異鄉應被傍人暗相笑閑官那得許多忙
伯兄海上思相見幼子山南憶別離兩地關心歸未得夜看雲漢立多時

遠違闕庭二首

戀闕思家兩繫情君王恩重屢留行欲知去國遲遲意三日祇趨一日程
形如槁木榮枯泯心似虛舟去住忘底事別情猶不奈只因懷德慕賢王

遊峨眉山紀行十首

一鶴相隨復一瓢山巔水滸足逍遙祇因戀闕情無限回首忘過萬里橋
西蜀雲山處處奇最奇人說在峨眉想應踏遍千崖月露滴松梢鶴夢時
出郭涼風入抱清亂山遮馬似相迎寧知待召登瀛客忽作看雲聽水行
王憐塵土辱凡肌命入雲山茹紫芝只恐同袍不相識誤猜禮佛到峨眉
客久賢王兩賜衣不知春到已春歸清朝試出都門看留得殘紅一片飛
山頭月出天初露江面風生水欲波正是勝遊新得意片雲相引入岷峨
朝辭宮闕莫田家江白山青兩岸沙臥犬不驚籬落靜麥風簷底響線車

孤舟湖口一名僧咫尺鄉山識未曾今去峨眉同覽勝躋攀須上百千層
名山佳處孰同遊白髮緇衣四五流青眼古銘鄉士彥燈前夜夜話台州
學僊無骨佛無緣甘著儒冠坐一氈入社敢同陶靖節不須三啖虎溪前

入山後覽定水仰山二上人并吳講師次子發成都絕句韻因復次韻述
事言懷十首

落日斜明掛樹瓢下方城郭去人遙青山過雨僧深定門外雲封獨木橋
羽客禪僧也好奇將人覓句幾攢眉林端新月初高夜葉底殘紅落盡時
倚澗人家近更清吠風驚犬走還迎衲衣鶴氅從章甫落日看山一字行

山南夫子待多時庭外松花落澗芝夜半夢回聞鼓響覺來顙泚冷沾眉
澗底白頭僧浣衣雲間童子負薪歸幽栖更羨投林鳥半已尋巢半已飛
千尋古木已無柯萬丈深淵不起波此日勝遊他日記落花時節到中峨

東海西頭是我家門前花徑接鷗沙三年別後一作却徒多恨敢道詩書讀五車

山行十日只逢僧盡道蒙恩報未曾共上峨眉望宮闕祥雲五色繞三層

奉詔名山作勝遊壯懷如水不停流今朝獨坐峨眉頂一覽端能隘九州

榻借禪那豈夙緣坐來渾是舊家氈祇應心事慚蘇晉不解長齋繡佛前

次韻寫懷送叔貞之成都十七首

有序

乙亥新春出城東偶作十七詩同遊諸友從而和之因亦次韻以寫所

懷會叔貞之成都書以識別詩中所云司戶孫者卽叔貞也

道濟羣生心尙歎知周萬物禮逾勤能爲世上難行事始是人中寡過人

感世豈無謀國者漢家長憶富民侯榮名史策尋常事公論江河萬古流

漢高嫚士千餘載不見師臣與友臣解使時君謙德重孔明而下兩三人

下士立身涇渭渾胸中耿耿是非存子雲美新最可賤著作猶尊李仲元

密葉叢篁噪晚鴉荒村百里兩三家疲民采拾供租稅猶恐傍人議權茶

多才久要錢文學長日詩筒袞袞來俊思雪消三峽長好懷春到百花開

伯尙庭前傾竹葉用中宅畔看梅花天教二子相爲樂來往風流也足誇

每懷樽散鄭司戶喜看杞梓作孫枝氣清似得江山助才異休令匠石疑

胡生挾策行千里足繭衣穿不肯回斯道要爲終古計丈夫寧避俗人猜
江山萬里無黃耳雨露三年憶紫荊日暮出門聞鴈過忍聽雲畔索羣聲
一念無爲付道耕百邪還聽斂心兵本原能與天同體三代功名始可成
浩蕩乾坤爛熳春天將樂意付窮人迥無臭味堪誇世縱有爭心豈解嗔
烏石岡頭白苧衣幾回醉伴夕陽歸山中兄弟遙相憶未必天心與我違
我與東風作主賓忍教負却太平春一觴一詠酬佳景也未輸他世上人
梅逕桃蹊遶葦門半依城市半通村春風一見如相識莫逆於心兩不言
魚在深淵鳥在山乾坤無物不相關野亭日午支頤坐閑看雲天一鶴還
食罷移床坐小亭細看羣蟻奪餘腥倦來莞爾成微笑宇宙茫茫幾廢興

感舊九首

雄文不見林公輔病眼荒荒何處開將相亦輸天上樂多情莫向世間來
杯酒論心有幾人天台張穀舊相親近來詩句多奇語書比藏真更絕倫
精通八法楊文遇暗誦五經陳用中揮翰天庭應獨步忍饑村巷欲成翁

翰苑暫歸盧太史銓曹已失鄭郎中名高金殿龍頭選夢憶蒼山馬鬣封
林鄭爲文學我家波瀾議論闊無涯兩年不見何時到望斷蟠江八月槎
博陵博士才華盛漢上畸人道術卑欲寄一書無鴈過相期千古只心知
立言溫粹懷陳采肆筆縱橫憶鮑岡若使韓門加接引未容籍湜獨升堂
王郎遠逐雲中戍許子俄爲地下郎重訪舊人尋舊迹嶺雲溪月總堪傷
多病深知志術荒中年苦復厭文章欲圖天地相終始肯與時人較短長

別母舅哭外舅鄭公三首

昔奉安車共入關擬於此路復南還今朝獨向江東去淚洒西風草樹斑
女甥攜抱遠相從骨肉情深反負公南鄭江頭三尺塚夕陽衰草萬山中
竹帛相期古道深結婚端不爲多金自慚非是奇男子恐負侯高擇壻心

中秋對月二首

雙櫓鳴江水不波雲山無數拂船過夜深把酒問明月月色與愁誰較多
南鄭荒墳草木寒東甌舊宅桂花丹九秋最好今宵月又向孤舟獨自看

題漢中三寺佛放光

三寺神燈古有名我來惟見月華清非關佛日今消歇應避文星不敢明

蜀相像

羽扇綸巾一臥龍誓匡寶祚剪奸雄圖開八陣神機外國定三分掌握中

買臣妻墓

青草池邊一故丘千年埋骨不埋羞丁寧囑付人間婦自古糟糠合到頭

二喬觀書

深閨睡起讀兵書窈窕丰姿若个誰千古周南風化本晚涼何不誦關雎

王節婦

兩月孤兒百里墳一燈風雨幾黃昏可憐玉帳豪華客不識金沙節義門

鄭義門

丹詔旌門已拜嘉千年盛典實堪誇史臣何用春秋筆天子親書孝義家

彭山道中

煙鳥歸林已夕陽野人相引度高岡馬頭一片青山影經過絺衣似水涼

夜度桑洲驛

山路彎彎石磴平碧天涼露下三更無端一夜西風惡吹着新愁上紫荆

客至

竹裏烹茶費屢呼攜壺沽酒遠村無同冷麥飯無難色風概知非淺丈夫

聞盧原質表兄廷試探花郎授編修喜而寄之

奉天殿上榜初開共賀江南得秀才好是青蘿居士說近來文運屬天台

送義烏龔叔安給事歸省二首

鷄舌同舍侍紫宸朝回東閣每相親片帆忽逐西風去鴛鷺行中少一人

繡湖煙雨正宜秋之子還家喜得遊忠孝堂前舊明月相隨重到鳳池頭

談詩五首

舉世皆宗李杜詩不知李杜更宗誰能探風雅無窮意始是乾坤絕妙詞

前宋文章配兩周盛時詩律亦無儔今人未識崑崙派却笑黃河是濁流

發揮道德乃成文枝葉何曾離本根末俗競工繁縟體千秋精意與誰論
大曆諸公製作新力排舊習祖唐人粗豪未脫風沙氣難詆熙豐作後塵
萬古乾坤此道存前無端緒後無垠手操北斗調元氣散作桑麻雨露恩
覽陳先生見和諸詩戲題

孔璋揮翰檄曹公烈日秋霜格力雄白髮雲孫千載後新詩尙可愈頭風
道者扇

競利爭名不暫休紛紛盡逐水東流道人心事如松柏閱盡尋常草木秋

題山水隱者

先生六歲時作

棟宇參差逼翠微路通猶恐世人知等閑識得東風面臥看白雲初起時

題山水

霜落江南木葉丹滔天波浪一舟還何人得似林中叟目送浮雲過遠山

修德惠枯木圖次韻四首

有序

修德先生寄惠枯木小幅并以詩留別病中不能追從謹次韻奉答

四

遠別出門愁見難燕山越水路盤盤將心付與天邊月兩地清宵一樣看
月明樹影落晴波寫寄山房古意多已分此身同槁木歲寒相對老巖阿
百年禮樂愧前賢濂洛微言久不傳待子歸來同講習細炊麥飯飲寒泉
至道無聞昧力行神交千載獨周程直教俯仰渾無愧始是堂堂世上英

見梅

寒梅凍後放幽姿何事今年花較遲昨日途中春意到溪頭纔見兩三枝

畫梅

微雪初消月半池籬邊遙見兩三枝清香傳得天心在未許尋常草木知

竹

不禁俗物敗人意忽見幽篁眼爲明記得舊遊天上夢連昌宮外聽秋聲

題東坡畫竹

丙翰何年寫畫圖眼中驚見鳳毛孤一枝潤帶江南雨遂使眉山草木枯

斑竹圖

湘君泣盡淚痕乾，翠袖蕭蕭倚暮寒。却憶洞庭爲客處，滿湖風月泛舟看。

墨菊二首

解印歸來鬢已斑，故園松菊可怡顏。祇緣三徑荒涼久，特寫秋花仔細看。
分根昔日向東籬，種近羲之洗硯池。幾度偶澆池上水，花開朵朵墨淋漓。

題鴈

順流舟楫日邊回，古木軒窗水際開。萬里西風數行鴈，送將秋色過江來。

馬

一日曾騎越與燕，鼓車隨後意茫然。人何必相羈絆，亦未乘龍去上天。

聞燕

曉夢驚回燕語巢，窗前紅日在花梢。心思佩玉朝天日，待漏金門鼓尙敲。

百雀圖

曲巷高簷避網羅，朝來飽啄隴頭禾。但令四海長豐稔，不厭人間鼠雀多。

義之籠鵝圖

內史清真江海情每將高誼動朝廷平生却被能書誤更爲鵝羣寫道經

荷花渚禽

絕世丰姿不受塵丹霞爲質玉爲神渚禽莫怪開時晚一洗尋常草木春

鸚鵡

幽禽兀自囀佳音玉立雕籠萬里心只爲從前解言語半生不得在山林

立春偶題二首

萬事悠悠白髮生強顏閱盡靜中聲效忠無計歸無路深媿淵明與孔明
百念蹉跎總未成世途深恐誤平生中宵擁被依牆坐默數降鷄報五更

方正學先生遜志齋集卷之二十四

國家圖書館



002447634

